

《妙法蓮華經》講表目錄(下)

己二、廣開顯斷疑生信 (分二)	268
庚一、誠信 (分三)	268
辛一、三誠	268
辛二、三請	268
辛三、重請重誠	268
庚二、正答 (分二)	269
辛一、長行 (分二)	269
壬一、開近顯遠 (分二)	269
癸一、執近之情	269
癸二、破近顯遠 (分二)	269
子一、正明顯遠	269
子二、舉喻格量 (分三)	269
丑一、舉喻難問	269
丑二、答其難知	270
丑三、合顯久遠	270
壬二、三世益物 (分二)	270
癸一、法說 (分二)	270
子一、正明三世益物 (分三)	270
丑一、明過去益物 (分三)	270
寅一、益物之處	270
寅二、拂跡中疑	271
寅三、正明益物	271
丑二、明現在益物 (分三)	271
寅一、機感現形	271
寅二、一代所說	272

寅三、巧說之由	272
丑三、明未來益物 <small>(分二)</small>	272
寅一、正明非減唱滅以益未來	272
寅二、釋須唱滅意 <small>(分二)</small>	273
卯一、不減有損	273
卯二、唱滅有益	273
子二、總結不虛	273
癸二、喻說 <small>(分二)</small>	274
子一、立喻 <small>(分二)</small>	274
丑一、良醫治子喻、喻上三世益物 <small>(分三)</small>	274
寅一、遠行喻喻過去益物	274
寅二、還來喻喻現在益物 <small>(分二)</small>	274
卯一、喻感應	274
卯二、喻施化 <small>(分二)</small>	274
辰一、喻現形	274
辰二、喻說法	275
寅三、復去喻喻未來益物 <small>(分四)</small>	275
卯一、喻不減有損	275
卯二、喻方便唱滅	275
卯三、喻唱滅有益	276
卯四、喻本實不減	276
丑二、治子實益喻、喻上總結不虛	276
子二、合法	276
辛二、重頌 <small>(分二)</small>	277
壬一、頌正式顯遠	277
壬二、頌三世益物 <small>(分二)</small>	277
癸一、頌法說 <small>(分二)</small>	277
子一、正頌三世益物 <small>(分三)</small>	277

丑一、頌過去	277
丑二、頌現在	277
丑三、頌未來 <small>(分二)</small>	278
寅一、頌方便唱滅兼頌須唱滅意	278
寅二、頌本實不滅兼釋不見得見之由	278
子二、頌總結不虛	279
癸二、頌喻說 <small>(分二)</small>	279
子一、頌立喻	279
子二、頌合法	279
戊二、總授法身記 <small>(分三)</small>	280
己一、經家敘益	280
己二、如來分別	280
己三、瑞表圓益	281
戊三、結申眾領解 <small>(分三)</small>	281
己一、頌時眾得解	281
己二、頌如來分別	282
己三、頌瑞表圓益	282
丙三、流通段 <small>(分三)</small>	283
丁一、明初品因功德以勸流通 <small>(分二)</small>	283
戊一、現在四信 <small>(分四)</small>	283
己一、一念信解 <small>(分二)</small>	283
庚一、長行 <small>(分三)</small>	283
辛一、出相貌	283
辛二、示功德	284
辛三、明位行不退	284
庚二、重頌 <small>(分三)</small>	284
辛一、頌格量功德	284
辛二、頌位行不退	285

辛三、頌深心信解	286
己二、解其言趣	286
己三、聞持供養	286
己四、深信觀成	286
戊二、滅後五品 <small>(分二)</small>	287
己一、粗格量後四品功德 <small>(分二)</small>	287
庚一、長行 <small>(分四)</small>	287
辛一、起隨喜讚誦	287
辛二、加教人受持	287
辛三、加兼行六度	288
辛四、加正行六度	288
庚二、重頌 <small>(分四)</small>	289
辛一、頌第二品	289
辛二、頌第三品	290
辛三、頌第四品	290
辛四、頌第五品	290
己二、廣格量初品功德	292
庚一、彌勒請問	292
庚二、如來垂答 <small>(分二)</small>	292
辛一、長行 <small>(分二)</small>	292
壬一、隨喜轉教功德 <small>(分四)</small>	292
癸一、展轉相教	292
癸二、格量之本	293
癸三、問答顯勝	293
癸四、正式格量	294
壬二、聽法勸人功德 <small>(分四)</small>	294
癸一、自往聽法	294
癸二、分座與人	294

癸三、勸往聽經	295
癸四、具聽修行	295
辛二、重頌 ^(分二)	295
壬一、頌隨喜轉教功德	295
壬二、頌聽法勸人功德	296
丁二、明初品果功德以勸流通 ^(分二)	298
戊一、總標六根清淨	298
戊二、別釋六根功德 ^(分六)	298
己一、眼根功德 ^(分二)	298
庚一、長行	298
庚二、重頌	298
己二、耳根功德 ^(分二)	299
庚一、長行	299
庚二、重頌	300
己三、鼻根功德 ^(分二)	301
庚一、長行	301
庚二、重頌	302
己四、舌根功德 ^(分二)	304
庚一、長行	304
庚二、重頌	305
己五、身根功德 ^(分二)	306
庚一、長行	306
庚二、重頌	307
己六、意根功德 ^(分二)	307
庚一、長行	307
庚二、重頌	308
丁三、引信毀福罪證以勸流通 ^(分二)	310
戊一、長行 ^(分二)	310

己一、雙指前品所說罪福	310
己二、雙開今品往昔信毀	310
庚一、明事本	310
辛一、最初一佛	310
辛二、次第二萬億佛	311
庚二、明本事	311
辛一、初標時節人名	311
辛二、徵釋不輕之名	311
壬一、不輕之行	311
壬二、得名之由	312
己三、雙明信毀果報	312
庚一、明信者果報	312
辛一、正明果報	312
壬一、現報	312
壬二、生報	313
壬三、後報	313
辛二、結會古今	314
庚二、明毀者果報	314
辛一、正明果報	314
辛二、結會果報	314
壬一、結會	314
壬二、勸持	315
戊二、重頌	315
己一、頌雙開今品信毀	315
庚一、頌事緣之本	315
庚二、頌時節人名	316
庚三、頌不輕之行	316
己二、頌雙明信毀果報	316

庚一、頌信毀果報	316
庚二、頌結會古今	316
庚三、頌功德勸持	317
甲三、流通迹本二門	318
乙一、明付囑流通 <small>(分二)</small>	318
丙一、菩薩受命弘經 <small>(分二)</small>	318
丁一、長行 <small>(分二)</small>	318
戊一、菩薩受命	318
戊二、佛現神力 <small>(分五)</small>	318
己一、放光動地	318
己二、普見大會	319
己三、諸天稱歎	319
己四、眾生歸命	320
己五、世界合一	320
戊三、結要勸持 <small>(分三)</small>	320
己一、稱歎付囑	320
己二、結要付囑	320
己三、勸持付囑	321
丁二、重頌	321
戊一、頌如來神力	321
戊二、頌稱歎勸持 <small>(分二)</small>	322
己一、頌稱歎	322
己二、頌勸持 <small>(分四)</small>	322
庚一、持一切法	322
庚二、自在神力	322
庚三、秘要之藏	323
庚四、甚深之事	324
丙二、如來摩頂付囑 <small>(分二)</small>	324

丁一、付囑受命	(分三)	324
戊一、如來付囑	(分三)	324
己一、正明付囑		324
己二、釋付囑意		324
己三、誠勉隨宜		324
戊二、菩薩領受		325
戊三、事畢唱散		325
丁二、時眾歡喜		325
乙二、約化他勸流通	(分四)	327
丙一、勗弘法之師	(分四)	327
丁一、宿王請問		327
丁二、如來垂答	(分二)	327
戊一、正答苦行	(分二)	327
己一、明事本		327
己二、明本事	(分二)	327
庚一、彼佛說法		328
庚二、廣修供養	(分二)	328
辛一、現生供養	(分二)	328
壬一、修行得法		328
壬二、作念報恩	(分二)	328
癸一、三昧供養		328
癸二、燒身供養	(分三)	329
子一、燒身		329
子二、佛讚		329
子三、時節		330
辛二、次生供養	(分五)	330
壬一、生在王家		330
壬二、說昔本事		330

壬三、往詣佛所	331
壬四、如來付囑	331
壬五、奉命任持 <small>(分四)</small>	332
癸一、滅後起塔	332
癸二、燒臂供養	332
癸三、時眾獲益	332
癸四、燒臂還復	333
庚三、結會古今	333
戊二、歎經功深 <small>(分三)</small>	333
己一、歎能持經人	333
己二、歎所持經法 <small>(分二)</small>	334
庚一、歎法體	334
庚二、歎法用	335
己三、明持經福德 <small>(分二)</small>	335
庚一、明持全經福	335
庚二、明持此品福 <small>(分二)</small>	336
辛一、格量	336
辛二、付囑	337
丁三、聞法利益	337
丁四、多寶稱讚	337
丙二、勗受法弟子	339
丁一、妙音說法 <small>(分六)</small>	339
戊一、放光東照	339
戊二、奉命西來 <small>(分二)</small>	339
己一、發來之緣 <small>(分五)</small>	339
庚一、經家敘德	339
庚二、被照辭佛	340
庚三、彼佛垂誠	340

庚四、妙音受旨	341
庚五、先現來相 <small>(分六)</small>	341
辛一、妙音現瑞	341
辛二、文殊請問	341
辛三、如來垂答	341
辛四、文殊請見	342
辛五、推功多寶	342
辛六、多寶命來	342
己二、正明發來 <small>(分六)</small>	343
庚一、眷屬經歷	343
庚二、敘相登台	343
庚三、問訊傳旨	343
庚四、請見多寶	344
庚五、世尊為通	344
庚六、塔中稱喜	344
戊三、十方弘經	344
己一、問答善根神力 <small>(分二)</small>	344
庚一、華德疑問	345
庚二、如來垂答 <small>(分二)</small>	345
辛一、正答善根功德	345
辛二、廣明神力應化	346
己二、問答住何三昧 <small>(分二)</small>	347
庚一、問	347
庚二、答	347
戊四、二土得益	347
戊五、還歸本國	348
戊六、聞品進道	348
丁二、普門圓應 <small>(分二)</small>	349

戊一、問答顯德 <small>(分二)</small>	349
己一、長行 <small>(分二)</small>	349
庚一、初番問答 <small>(分二)</small>	349
辛一、問	349
辛二、答 <small>(分三)</small>	349
壬一、總答	349
壬二、別答 <small>(分三)</small>	349
癸一、約口業機明應 <small>(分二)</small>	349
子一、免除七難 <small>(分七)</small>	349
丑一、火難	350
丑二、水難	350
丑三、羅剎難	350
丑四、刀杖難	350
丑五、惡鬼難	350
丑六、枷鎖難	351
丑七、怨賊難	351
子二、結歎	351
癸二、約意業機明應 <small>(分二)</small>	352
子一、遠離三毒	352
子二、結歎	352
癸三、約身業機明應 <small>(分二)</small>	352
子一、成就二求	352
子二、結歎	353
壬三、結勸持名 <small>(分三)</small>	353
癸一、勸持	353
癸二、格量	353
癸三、結歎	353
庚二、次番問答 <small>(分二)</small>	354

辛一、問	354
辛二、答 (分三)	354
壬一、別答	354
壬二、總答	356
壬三、結勸供養 (分三)	356
癸一、正式勸供	356
癸二、受旨奉行 (分六)	356
子一、奉命	356
子二、不受	356
子三、重奉	357
子四、佛勸	357
子五、轉供	357
子六、結歎	357
己二、重頌 (分三)	358
庚一、雙頌兩問	358
庚二、雙頌二答 (分二)	358
辛一、總歎行願	358
辛二、別頌二答 (分二)	358
壬一、頌前答 (分二)	358
癸一、頌總答	358
癸二、頌別答 (分二)	358
子一、頌免除七難 (分十二)	358
丑一、頌火難	359
丑二、頌水難	359
丑三、頌墮須彌難	359
丑四、頌墮金剛山難	359
丑五、頌怨賊難	359
丑六、頌刀杖難	359

丑七、頌枷鎖難	360
丑八、頌咒詛毒藥難	360
丑九、頌惡鬼難	360
丑十、頌惡獸難	360
丑十一、頌蛇蠍難	360
丑十二、頌雷雨難	360
子二、頌三毒二求	360
壬二、頌後答 <small>(分二)</small>	360
癸一、頌普門示現 <small>(分三)</small>	360
子一、身業普應	361
子二、意業普觀	361
子三、口業普說	361
癸二、頌顯機顯應	361
庚三、雙頌二勸 <small>(分二)</small>	361
辛一、頌勸持名	362
辛二、頌勸供養	362
戊二、聞品獲益 <small>(分二)</small>	362
己一、持地歎德	362
己二、經家述益	362
丙三、明咒護 <small>(分三)</small>	363
丁一、問答持經功德	363
丁二、請以神咒護持 <small>(分五)</small>	363
戊一、藥王咒護 <small>(分三)</small>	363
己一、請護	363
己二、稱歎	364
己三、印可	364
戊二、勇施咒護 <small>(分二)</small>	365
己一、請護	365

己二、稱歎	365
戊三、毘沙門咒護 <small>(分二)</small>	365
己一、請護	365
己二、稱歎	366
戊四、持國咒護 <small>(分二)</small>	366
己一、請護	366
己二、稱歎	366
戊五、羅刹女咒護 <small>(分四)</small>	367
己一、請護	367
己二、稱歎	367
己三、誓願	368
己四、印可	368
丁三、會眾聞品得益	369
丙四、明人護 <small>(分六)</small>	370
丁一、略明本事	370
丁二、標所化能化	370
丁三、明能化方便 <small>(分三)</small>	370
戊一、時至	370
戊二、論議	371
戊三、現化	371
丁四、明所化得益 <small>(分十)</small>	372
戊一、信子伏師	372
戊二、自求出家	372
戊三、勸親觀佛	373
戊四、敘歎功德	373
戊五、聞法供養	373
戊六、佛授王記	374
戊七、出家修行	374

戊八、稱歎二子	375
戊九、佛述行高	375
戊十、讚佛自誓	376
丁五、結會古今	376
丁六、聞品進道	377
乙三、約自行勸流通 <small>(分四)</small>	378
丙一、經家敘儀	378
丙二、普賢勸發 <small>(分三)</small>	378
丁一、請問勸發 <small>(分二)</small>	378
戊一、問	378
戊二、答	378
丁二、誓願勸發 <small>(分二)</small>	379
戊一、誓願護人 <small>(分六)</small>	379
己一、攘其外難	379
己二、教以內法 <small>(分三)</small>	379
庚一、行立讀誦	379
庚二、常坐思惟	380
庚三、三七精進	380
己三、覆以神力	381
己四、顯現勝因	381
己五、示以近果	381
己六、總結勸修	382
戊二、誓願護法	382
丙三、如來述發 <small>(分二)</small>	382
丁一、先述護法	383
丁二、正述護人 <small>(分五)</small>	383
戊一、示其身教	383
戊二、顯示勝因	383

戊三、述以近果	384
戊四、攘其外難	384
戊五、信受功德	384
丙四、聞品受益 <small>(分三)</small>	385
丁一、聞品利益	385
丁二、聞經利益	385

妙法蓮華經 卷五

如來壽量品第十六



己二、廣開顯斷疑生信 (分二)

庚一、誠信 (分三)

辛一、三誠

爾時，佛告諸菩薩及一切大眾：諸善男子！汝等當信解如來誠諦之語。復告大眾：汝等當信解如來誠諦之語。又復告諸大眾：汝等當信解如來誠諦之語。

辛二、三請

是時菩薩大眾，彌勒為首，合掌白佛言：世尊！惟願說之，我等當信受佛語。如是三白已。

辛三、重請重誠

復言：惟願說之，我等當信受佛語。爾時，世尊知諸菩薩三請不止，而告之言：汝等諦聽。

庚二、正答 (分二)

辛一、長行 (分二)

壬一、開近顯遠 (分二)

癸一、執近之情

如來秘密神通之力。一切世間天人及阿修羅，皆謂：今釋迦牟尼佛出釋氏宮，去伽耶城不遠，坐於道場，得阿耨多羅三藐三菩提。

癸二、破近顯遠 (分二)

子一、正明顯遠

然善男子！我實成佛已來，無量無邊百千萬億那由他劫。

子二、舉喻格量 (分三)

丑一、舉喻難問

譬如五百千萬億那由他阿僧祇三千大千世界，假使有人抹為微塵，過於東方五百千萬億那由他阿僧祇國，乃下一塵；如是東行，盡是微塵。諸善男子，於意云何？是諸世界，可得思惟校計，知其數不？

丑二、答其難知

彌勒菩薩等，俱白佛言：世尊！是諸世界，無量無邊，非算數所知，亦非心力所及。一切聲聞、辟支佛，以無漏智，不能思惟知其限數。我等住阿惟越致地，於是事中，亦所不達。世尊！如是諸世界，無量無邊。

丑三、合顯久遠

爾時，佛告大菩薩眾：諸善男子！今當分明宣語汝等。是諸世界，若著微塵及不著者，盡以為塵，一塵一劫；我成佛已來，復過於此百千萬億那由他阿僧祇劫。

壬二、三世益物（分二）

癸一、法說（分二）

子一、正明三世益物（分三）

丑一、明過去益物（分三）

寅一、益物之處

自從是來，我常在此娑婆世界，說法教化；亦於餘處百千萬億那由他阿僧祇國，導利眾生。

寅二、拂跡中疑

諸善男子！於是中間，我說燃燈佛等，又復言其入於涅槃，如是皆以方便分別。

寅三、正明益物

諸善男子！若有眾生來至我所，我以佛眼，觀其信等諸根利鈍，隨所應度，處處自說名字不同、年紀大小，亦復現言當入涅槃，又以種種方便，說微妙法，能令眾生發歡喜心。

丑二、明現在益物 (分三)

寅一、機感現形

諸善男子！如來見諸眾生，樂於小法，德薄垢重者，為是人說：我少出家，得阿耨多羅三藐三菩提。然我實成佛已來，久遠若斯；但以方便教化眾生，令入佛道，作如是說。

寅二、一代所說

諸善男子！如來所演經典，皆為度脫眾生，或說己身，或說他身；或示己身，或示他身；或示己事，或示他事；諸所言說，皆實不虛。

寅三、巧說之由

所以者何？如來如實知見三界之相，無有生死，若退若出，亦無在世及滅度者。非實非虛，非如非異，不如三界見於三界。如斯之事，如來明見，無有錯謬。以諸眾生有種種性、種種欲、種種行、種種憶想分別故；欲令生諸善根，以若干因緣、譬喻、言辭，種種說法，所作佛事，未曾暫廢。

丑三、明未來益物（分二）

寅一、正明非滅唱滅以益未來

如是，我成佛已來，甚大久遠，壽命無量阿僧祇劫，常住不滅。

諸善男子！我本行菩薩道，所成壽命，今猶未盡，復倍上數。然今非實滅度，而便唱言：當取滅度，如來以是方便，教化眾生。

寅二、釋須唱滅意(分二)

卯一、不滅有損

所以者何？若佛久住於世，薄德之人，不種善根，貧窮下賤，貪著五欲，入於憶想妄見網中。若見如來常在不滅，便起憍恣，而懷厭怠，不能生難遭之想、恭敬之心。

卯二、唱滅有益

是故如來以方便說。比丘當知！諸佛出世，難可值遇。所以者何？諸薄德人，過無量百千萬億劫，或有見佛或不見者，以此事故，我作是言：諸比丘！如來難可得見！斯眾生等聞如是語，必當生於難遭之想，心懷戀慕，渴仰於佛，便種善根；是故如來雖不實滅，而言滅度。

子二、總結不虛

又善男子！諸佛如來，法皆如是，為度眾生，皆實不虛。

癸二、喻說(分二)

子一、立喻(分二)

丑一、良醫治子喻、喻上三世益物(分三)

寅一、遠行喻喻過去益物

譬如良醫，智慧聰達，明練方藥，善治眾病。其人多諸子息，若十、二十乃至百數，以有事緣，遠至餘國。

寅二、還來喻喻現在益物(分二)

卯一、喻感應

諸子於後，飲他毒藥，藥發悶亂，宛轉於地。

卯二、喻施化(分二)

辰一、喻現形

是時，其父還來歸家，諸子飲毒，或失本心，或不失者，遙見其父，皆大歡喜，拜跪問訊，善安隱歸，我等愚癡，誤服毒藥，願見救療，更賜壽命。

辰二、喻說法

父見子等苦惱如是，依諸經方，求好藥草，色香美味，皆悉具足，擣

篩和合，與子令服。而作是言：此大良藥，色香美味，皆悉具足，汝等可服，速除苦惱，無復眾患。其諸子中，不失心者，見此良藥，色香俱好，即便服之，病盡除愈。

寅三、復去喻喻未來益物（分四）

卯一、喻不滅有損

餘失心者，見其父來，雖亦歡喜問訊，求索治病，然與其藥，而不肯服。所以者何？毒氣深入，失本心故，於此好色香藥，而謂不美。

卯二、喻方便唱滅

父作是念：此子可愍，為毒所中，心皆顛倒，雖見我喜，求索救療，如是好藥，而不肯服；我今當設方便，令服此藥。即作是言：汝等當知！我今衰老，死時已至，是好良藥，今留在此，汝可取服，勿憂不瘥。作是教已，復至他國，遣使還告，汝父已死。

卯三、喻唱滅有益

是時諸子聞父背喪，心大憂惱。而作是念：若父在者，慈愍我等，能

見救護；今者捨我，遠喪他國，自惟孤露，無復恃怙。常懷悲感，心遂醒悟，乃知此藥色香美味，即取服之，毒病皆癒。

卯四、喻本實不滅

其父聞子悉已得瘥，尋便來歸，咸使見之。

丑二、治子實益喻、喻上總結不虛

諸善男子！於意云何？頗有人能說此良醫虛妄罪不？不也！世尊！

子二、合法

佛言：我亦如是！成佛已來，無量無邊百千萬億那由他阿僧祇劫，為眾生故，以方便力，言當滅度，亦無有能如法說我虛妄過者。

辛二、重頌（分二）

壬一、頌正式顯遠

爾時，世尊欲重宣此義，而說偈言：

自我得佛來 所經諸劫數 無量百千萬 億載阿僧祇

壬二、頌三世益物(分二)

癸一、頌法說(分二)

子一、正頌三世益物(分三)

丑一、頌過去

常說法教化 無數億眾生 令入於佛道 爾來無量劫
為度眾生故 方便現涅槃 而實不滅度 常住此說法
我常住於此 以諸神通力 令顛倒眾生 雖近而不見

丑二、頌現在

眾見我滅度 廣供養舍利 咸皆懷戀慕 而生渴仰心
眾生既信伏 質直意柔軟 一心欲見佛 不自惜身命
時我及眾僧 俱出靈鷲山 我時語眾生 常在此不滅
以方便力故 現有滅不滅

丑三、頌未來(分二)

寅一、頌方便唱滅兼頌須唱滅意

餘國有眾生 恭敬信樂者 我復於彼中 為說無上法

汝等不聞此 但謂我滅度 我見諸眾生 沒在於苦惱
故不為現身 令其生渴仰 因其心戀慕 乃出為說法

寅二、頌本實不滅兼釋不見得見之由

神通力如是 於阿僧祇劫 常在靈鷲山 及餘諸住處
眾生見劫盡 大火所燒時 我此土安隱 天人常充滿
園林諸堂閣 種種寶莊嚴 寶樹多華果 眾生所遊樂
諸天擊天鼓 常作眾伎樂 雨曼陀羅華 散佛及大眾
我淨土不毀 而眾見燒盡 憂怖諸苦惱 如是悉充滿
是諸罪眾生 以惡業因緣 過阿僧祇劫 不聞三寶名
諸有修功德 柔和質直者 則皆見我身 在此而說法
或時為此眾 說佛壽無量 久乃見佛者 為說佛難值

子二、頌總結不虛

我智力如是 慧光照無量 壽命無數劫 久修業所得
汝等有智者 勿於此生疑 當斷令永盡 佛語實不虛

癸二、頌喻說（分二）

子一、頌立喻

如醫善方便 為治狂子故 實在而言死 無能說虛妄

子二、頌合法

我亦為世父	救諸苦患者	為凡夫顛倒	實在而言滅
以常見我故	而生憍恣心	放逸著五欲	墮於惡道中
我常知眾生	行道不行道	隨所應可度	為說種種法
每自作是意	以何令眾生	得入無上慧	速成就佛身

妙法蓮華經 卷五

分別功德品第十七



戊二、總授法身記（分三）

己一、經家敘益

爾時，大會聞佛說壽命劫數長遠如是，無量無邊阿僧祇眾生，得大饒益。

己二、如來分別

於時，世尊告彌勒菩薩摩訶薩：

阿逸多！我說是如來壽命長遠時，

六百八十萬億那由他恆河沙眾生，得無生法忍；

復有千倍菩薩摩訶薩，得聞持陀羅尼門；

復有一世界微塵數菩薩摩訶薩，得樂說無礙辯才；

復有一世界微塵數菩薩摩訶薩，得百千萬億無量旋陀羅尼；

復有三千大千世界微塵數菩薩摩訶薩，能轉不退法輪；

復有二千中國土微塵數菩薩摩訶薩，能轉清淨法輪；

復有小千國土微塵數菩薩摩訶薩，八生當得阿耨多羅三藐三菩提；

復有四四天下微塵數菩薩摩訶薩，四生當得阿耨多羅三藐三菩提；

復有三四天下微塵數菩薩摩訶薩，三生當得阿耨多羅三藐三菩提；
復有二四天下微塵數菩薩摩訶薩，二生當得阿耨多羅三藐三菩提；
復有一四天下微塵數菩薩摩訶薩，一生當得阿耨多羅三藐三菩提；
復有八世界微塵數眾生，皆發阿耨多羅三藐三菩提心。

己三、瑞表圓益

佛說是諸菩薩摩訶薩得大法利時，於虛空中，雨曼陀羅華、摩訶曼陀羅華，以散無量百千萬億寶樹下，師子座上諸佛，並散七寶塔中，師子座上釋迦牟尼佛及久滅度多寶如來，亦散一切諸大菩薩及四部眾。又雨細末梅檀、沉水香等，於虛空中，天鼓自鳴，妙聲深遠；又雨千種天衣，垂諸瓔珞、真珠瓔珞、摩尼珠瓔珞、如意珠瓔珞，遍於九方，眾寶香爐，燒無價香，自然周至，供養大會。一一佛上，有諸菩薩，執持幡蓋，次第而上，至於梵天。是諸菩薩，以妙音聲，歌無量頌，讚歎諸佛。

戊三、結申眾領解（分三）

己一、頌時眾得解

爾時，彌勒菩薩從座而起，偏袒右肩，合掌向佛，而說偈言：

佛說希有法 昔所未曾聞 世尊有大力 壽命不可量
無數諸佛子 聞世尊分別 說得法利者 歡喜充遍身

己二、頌如來分別

或住不退地 或得陀羅尼 或無礙樂說 萬億旋總持
或有大千界 微塵數菩薩 各各皆能轉 不退之法輪
復有中千界 微塵數菩薩 各各皆能轉 清淨之法輪
復有小千界 微塵數菩薩 餘各八生在 當得成佛道
復有四三二 如此四天下 微塵諸菩薩 隨數生成佛
或一四天下 微塵數菩薩 餘有一生在 當成一切智
如是等眾生 聞佛壽長遠 得無量無漏 清淨之果報
復有八世界 微塵數眾生 聞佛說壽命 皆發無上心

己三、頌瑞表圓益

世尊說無量 不可思議法 多有所饒益 如虛空無邊

兩天曼陀羅	摩訶曼陀羅	釋梵如恆沙	無數佛土來
雨栴檀沉水	繽紛而亂墜	如鳥飛空下	供散於諸佛
天鼓虛空中	自然出妙聲	天衣千萬種	旋轉而來下
眾寶妙香爐	燒無價之香	自然悉周徧	供養諸世尊
其大菩薩眾	執七寶幡蓋	高妙萬億種	次第至梵天
一一諸佛前	寶幢懸勝幡	亦以千萬偈	歌詠諸如來
如是種種事	昔所未曾有	聞佛壽無量	一切皆歡喜
佛名聞十方	廣饒益眾生	一切具善根	以助無上心

丙三、流通段 (分三)

丁一、明初品因功德以勸流通 (分二)

戊一、現在四信 (分四)

己一、一念信解 (分二)

庚一、長行 (分三)

辛一、出相貌

爾時，佛告彌勒菩薩摩訶薩：阿逸多！其有眾生，聞佛壽命長遠如是，乃至能生一念信解，所得功德，無有限量。

辛二、示功德

若有善男子、善女人，為阿耨多羅三藐三菩提故，於八十萬億那由他劫，行五波羅蜜：檀波羅蜜、尸羅波羅蜜、羼提波羅蜜、毘梨耶波羅蜜、禪波羅蜜，除般若波羅蜜，以是功德比前功德，百分、千分、百千萬億分不及其一，乃至算數譬喻所不能知。

辛三、明位行不退

若善男子、善女人，有如是功德，於阿耨多羅三藐三菩提退者，無有是處。

庚二、重頌(分三)

辛一、頌格量功德

爾時，世尊欲重宣此義，而說偈言：

若人求佛慧	於八十萬億	那由他劫數	行五波羅蜜
於是諸劫中	布施供養佛	及緣覺弟子	並諸菩薩眾
珍異之飲食	上服與臥具	栴檀立精舍	以園林莊嚴
如是等布施	種種皆微妙	盡此諸劫數	以迴向佛道

若復持禁戒 清淨無缺漏 求於無上道 諸佛之所歎
若復行忍辱 住於調柔地 設眾惡來加 其心不傾動
諸有得法者 懷於增上慢 為斯所輕惱 如是亦能忍
若復勤精進 志念常堅固 於無量億劫 一心不懈息
又於無數劫 住於空閑處 若坐若經行 除睡常攝心
以是因緣故 能生諸禪定 八十億萬劫 安住心不亂
持此一心福 願求無上道 我得一切智 盡諸禪定際
是人於百千 萬億劫數中 行此諸功德 如上之所說
有善男女等 聞我說壽命 乃至一念信 其福過於彼
若人悉無有 一切諸疑悔 深心須臾信 其福為如此

辛二、頌位行不退

其有諸菩薩 無量劫行道 聞我說壽命 是則能信受
如是諸人等 頂受此經典 願我於未來 長壽度眾生
如今日世尊 諸釋中之王 道場師子吼 說法無所畏
我等未來世 一切所尊敬 坐於道場時 說壽亦如是

辛三、頌深心信解

若有深心者 清淨而質直 多聞能總持 隨義解佛語
如是之人等 於此無有疑

己二、解其言趣

又阿逸多！若有聞佛壽命長遠，解其言趣，是人所得功德，無有限量，能起如來無上之慧。

己三、聞持供養

何況廣聞是經，若教人聞，若自持，若教人持，若自書，若教人書，若以華、香、瓔珞、幢幡、繒蓋、香油、酥燈，供養經卷，是人功德，無量無邊，能生一切種智。

己四、深信觀成

阿逸多！若善男子、善女人，聞我說壽命長遠，深心信解，則為見佛常在耆闍崛山，共大菩薩、諸聲聞眾，圍繞說法。又見此娑婆世界，其地琉璃，坦然平正，閻浮檀金，以界八道，寶樹行列，諸臺樓觀，皆悉寶成

，其菩薩眾，咸處其中。若有能如是觀者，當知是為深信解相。

戊二、滅後五品(分二)

己一、粗格量後四品功德(分二)

庚一、長行(分四)

辛一、起隨喜讀誦

又復如來滅後，若聞是經而不毀訾，起隨喜心，當知己為深信解相；何況讀誦受持之者，斯人則為頂戴如來。阿逸多！是善男子、善女人，不須為我復起塔寺，及作僧坊、以四事供養眾僧。所以者何？是善男子、善女人，受持讀誦是經典者，為已起塔、造立僧坊、供養眾僧。則為以佛舍利起七寶塔，高廣漸小至於梵天，懸諸幡蓋及眾寶鈴，華、香、瓔珞，末香、塗香、燒香、眾鼓伎樂，簫笛、箜篌，種種舞戲，以妙音聲，歌唄讚頌，則為於無量千萬億劫，作是供養已。

辛二、加教人受持

阿逸多！若我滅後，聞是經典，有能受持，若自書，若教人書，則為起立僧坊，以赤梅檀作諸殿堂三十有二，高八多羅樹，高廣嚴好，百千比

丘於其中止。園林浴池、經行禪窟，衣服、飲食、床褥、湯藥，一切樂具，充滿其中。如是僧坊、堂閣，若干百千萬億，其數無量，以此現前，供養於我及比丘僧。是故我說：如來滅後，若有受持讀誦，為他人說，若自書，若教人書，供養經卷，不須復起塔寺，及造僧坊、供養眾僧。

辛三、加兼行六度

況復有人，能持是經，兼行布施、持戒、忍辱、精進、一心、智慧，其德最勝，無量無邊。譬如虛空，東西南北、四維上下，無量無邊；是人功德，亦復如是無量無邊，疾至一切種智。

辛四、加正行六度

若人讀誦受持是經，為他人說，若自書，若教人書，復能起塔及造僧坊，供養讚歎聲聞眾僧，亦以百千萬億讚歎之法，讚歎菩薩功德，又為他人種種因緣，隨義解說此法華經；復能清淨持戒，與柔和者而共同止，忍辱無瞋，志念堅固，常貴坐禪，得諸深定，精進勇猛，攝諸善法，利根智慧，善答問難。

阿逸多！若我滅後，諸善男子、善女人，受持讀誦是經典者，復有如
是諸善功德，當知是人，已趣道場，近阿耨多羅三藐三菩提，坐道樹下。
阿逸多！是善男子、善女人，若坐、若立、若行處，此中便應起塔，
一切天人皆應供養，如佛之塔。

庚二、重頌（分四）

辛一、頌第二品

爾時，世尊欲重宣此義，而說偈言：

若我滅度後	能奉持此經	斯人福無量	如上之所說
是則為具足	一切諸供養	以舍利起塔	七寶而莊嚴
表剎甚高廣	漸小至梵天	寶鈴千萬億	風動出妙音
又於無量劫	而供養此塔	華香諸瓔珞	天衣眾伎樂
燃香油酥燈	周匝常照明	惡世法末時	能持是經者
則為已如上	具足諸供養		

辛二、頌第三品

若能持此經 則如佛現在 以牛頭栴檀 起僧坊供養
堂有三十二 高八多羅樹 上饌妙衣服 床臥皆具足
百千眾住處 園林諸浴池 經行及禪窟 種種皆嚴好

辛三、頌第四品

若有信解心 受持讀誦書 若復教人書 及供養經卷
散華香末香 以須曼蒼蔔 阿提目多伽 薰油常燃之
如是供養者 得無量功德 如虛空無邊 其福亦如是

辛四、頌第五品

況復持此經 兼布施持戒 忍辱樂禪定 不瞋不惡口
恭敬於塔廟 謙下諸比丘 遠離自高心 常思惟智慧
有問難不瞋 隨順為解說 若能行是行 功德不可量
若見此法師 成就如是德 應以天華散 天衣覆其身
頭面接足禮 生心如佛想 又應作是念 不久詣道場

得無漏無為 廣利諸人天 其所住止處 經行若坐臥
乃至說一偈 是中應起塔 莊嚴令妙好 種種以供養
佛子住此地 則是佛受用 常在於其中 經行及坐臥

妙法蓮華經 卷六

隨喜功德品第十八



己二、廣格量初品功德

庚一、彌勒請問

爾時，彌勒菩薩摩訶薩白佛言：世尊！若有善男子、善女人，聞是法華經隨喜者，得幾所福？而說偈言：

世尊滅度後 其有聞是經 若能隨喜者 為得幾所福

庚二、如來垂答 (分二)

辛一、長行 (分二)

壬一、隨喜轉教功德 (分四)

癸一、展轉相教

爾時，佛告彌勒菩薩摩訶薩：阿逸多！如來滅後，若比丘、比丘尼、優婆塞、優婆夷，及餘智者，若長若幼，聞是經隨喜已，從法會出，至於餘處，若在僧坊，若空閑地，若城邑、巷陌、聚落、田里，如其所聞，為父母、宗親、善友、知識，隨力演說。是諸人等，聞已隨喜，復行轉教，餘人聞已，亦隨喜轉教；如是展轉，至第五十。

癸二、格量之本

阿逸多！其第五十善男子、善女人，隨喜功德，我今說之，汝當善聽！若四百萬億阿僧祇世界，六趣四生眾生，卵生、胎生、濕生、化生，若有形、無形、有想、無想、非有想、非無想，無足、二足、四足、多足，如是等在眾生數者，有人求福，隨其所欲娛樂之具，皆給與之。一一眾生，與滿閻浮提金、銀、琉璃、碑磬、瑪瑙、珊瑚、琥珀，諸妙珍寶，及象、馬、車乘，七寶所成宮殿、樓閣等。是大施主，如是布施，滿八十年已，而作是念：我已施眾生娛樂之具，隨意所欲；然此眾生皆已衰老，年過八十，髮白面皺，將死不久，我當以佛法而訓導之。即集此眾生，宣布法化，示教利喜，一時皆得須陀洹道、斯陀含道、阿那含道、阿羅漢道，盡諸有漏，於深禪定皆得自在，具八解脫。

癸三、問答顯勝

於汝意云何？是大施主所得功德，寧為多不？彌勒白佛言：世尊！是人功德甚多，無量無邊；若是施主，但施眾生一切樂具，功德無量，何況令得阿羅漢果。

癸四、正式格量

佛告彌勒：我今分明語汝。是人以一切樂具，施於四百萬億阿僧祇世界六趣眾生，又令得阿羅漢果，所得功德，不如是第五十人聞法華經一偈隨喜功德，百分、千分、百千萬億分不及其一，乃至算數譬喻所不能知。阿逸多！如是第五十人，展轉聞法華經隨喜功德，尚無量無邊阿僧祇，何況最初於會中聞而隨喜者，其福復勝無量無邊阿僧祇，不可得比。

壬二、聽法勸人功德（分四）

癸一、自往聽法

又阿逸多！若人為是經故，往詣僧坊，若坐若立，須臾聽受；緣是功德，轉身所生，得好上妙象、馬，車乘、珍寶輦輿，及乘天宮。

癸二、分座與人

若復有人於講法處坐，更有人來，勸令坐聽，若分座令坐；是人功德，轉身得帝釋坐處，若梵王坐處，若轉輪聖王所坐之處。

癸三、勸往聽經

阿逸多！若復有人，語餘人言，有經名法華，可共往聽；即受其教，乃至須臾間聞。是人功德，轉身得與陀羅尼菩薩共生一處，利根智慧。百千萬世，終不瘖啞；口氣不臭，舌常無病，口亦無病，齒不垢黑、不黃不疏，亦不缺落，不差曲，唇不下垂，亦不褰縮、不麤澀、不瘡疹，亦不缺壞，亦不眇斜，不厚不大，亦不顰黑，無諸可惡。鼻不匾匱，亦不曲戾，面色不黑，亦不狹長，亦不窵曲，無有一切不可喜相。唇舌牙齒，悉皆嚴好，鼻修高直，面貌圓滿，眉高而長，額廣平正，人相具足，世世所生，見佛聞法，信受教誨。

癸四、具聽修行

阿逸多！汝且觀是勸於一人令往聽法，功德如此，何況一心聽說讀誦，而於大眾為人分別如說修行。

辛二、重頌（分二）

壬一、頌隨喜轉教功德

爾時，世尊欲重宣此義，而說偈言：

若人於法會 得聞是經典 乃至於一偈 隨喜為他說
如是展轉教 至於第五十 最後人獲福 今當分別之
如有大施主 供給無量眾 具滿八十歲 隨意之所欲
見彼衰老相 髮白而面皺 齒疏形枯竭 念其死不久
我今應當教 令得於道果 即為方便說 涅槃真實法
世皆不牢固 如水沫泡燄 汝等咸應當 疾生厭離心
諸人聞是法 皆得阿羅漢 具足六神通 三明八解脫
最後第五十 聞一偈隨喜 是人福勝彼 不可為譬喻
如是展轉聞 其福尚無量 何況於法會 初聞隨喜者

壬二、頌聽法勸人功德

若有勸一人 將引聽法華 言此經深妙 千萬劫難遇
即受教往聽 乃至須臾聞 斯人之福報 今當分別說
世世無口患 齒不疏黃黑 唇不厚褰缺 無有可惡相
舌不乾黑短 鼻高修且直 額廣而平正 面目悉端嚴

為人所喜見 口氣無臭穢 優鉢華之香 常從其口出
若故詣僧坊 欲聽法華經 須臾聞歡喜 今當說其福
後生天人中 得妙象馬車 珍寶之輦輿 及乘天宮殿
若於講法處 勸人坐聽經 是福因緣得 釋梵轉輪座
何況一心聽 解說其義趣 如說而修行 其福不可量

妙法蓮華經 卷六

法師功德品第十九



丁二、明初品果功德以勸流通(分二)

戊一、總標六根清淨

爾時，佛告常精進菩薩摩訶薩：若善男子、善女人，受持是法華經，若讀，若誦，若解說，若書寫，是人當得八百眼功德、千二百耳功德、八百鼻功德、千二百舌功德、八百身功德、千二百意功德，以是功德，莊嚴六根，皆令清淨。

戊二、別釋六根功德(分六)

己一、眼根功德(分二)

庚一、長行

是善男子、善女人，父母所生清淨肉眼，見於三千大千世界，內外所有山林河海，下至阿鼻地獄，上至有頂，亦見其中一切眾生，及業因緣果報生處，悉見悉知。

庚二、重頌

爾時，世尊欲重宣此義，而說偈言：

若於大眾中 以無所畏心 說是法華經 汝聽其功德

是人得八百 功德殊勝眼 以是莊嚴故 其目甚清淨
父母所生眼 悉見三千界 內外彌樓山 須彌及鐵圍
並諸餘山林 大海江河水 下至阿鼻獄 上至有頂處
其中諸眾生 一切皆悉見 雖未得天眼 肉眼力如是

己二、耳根功德 (分二)

庚一、長行

復次常精進！若善男子、善女人，受持此經，若讀，若誦，若解說，若書寫，得千二百耳功德。以是清淨耳，聞三千大千世界，下至阿鼻地獄，上至有頂，其中內外種種語言音聲。象聲、馬聲、牛聲、車聲，啼哭聲、愁歎聲，螺聲、鼓聲、鐘聲、鈴聲，笑聲、語聲，男聲、女聲、童子聲、童女聲，法聲、非法聲，苦聲、樂聲，凡夫聲、聖人聲，喜聲、不喜聲，天聲、龍聲、夜叉聲、乾闥婆聲、阿修羅聲、迦樓羅聲、緊那羅聲、摩睺羅伽聲，火聲、水聲、風聲，地獄聲、畜生聲、餓鬼聲，比丘聲、比丘尼聲，聲聞聲、辟支佛聲，菩薩聲、佛聲。以要言之，三千大千世界中，一切內外所有諸聲，雖未得天耳，以父母所生清淨常耳，皆悉聞知，如是

分別種種音聲，而不壞耳根。

庚二、重頌

爾時，世尊欲重宣此義，而說偈言：

父母所生耳	清淨無濁穢	以此常耳聞	三千世界聲
象馬車牛聲	鐘鈴螺鼓聲	琴瑟箜篌聲	簫笛之音聲
清淨好歌聲	聽之而不著	無數種人聲	聞悉能解了
又聞諸天聲	微妙之歌音	及聞男女聲	童子童女聲
山川險谷中	迦陵頻伽聲	命命等諸鳥	悉聞其音聲
地獄眾苦痛	種種楚毒聲	餓鬼飢渴逼	求索飲食聲
諸阿修羅等	居在大海邊	自共言語時	出於大音聲
如是說法者	安住於此間	遙聞是眾聲	而不壞耳根
十方世界中	禽獸鳴相呼	其說法之人	於此悉聞之
其諸梵天上	光音及遍淨	乃至有頂天	言語之音聲
法師住於此	悉皆得聞之	一切比丘眾	及諸比丘尼
若讀誦經典	若為他人說	法師住於此	悉皆得聞之

復有諸菩薩 讀誦於經法 若為他人說 撰集解其義
如是諸音聲 悉皆得聞之 諸佛大聖尊 教化眾生者
於諸大會中 演說微妙法 持此法華者 悉皆得聞之
三千大千界 內外諸音聲 下至阿鼻獄 上至有頂天
皆聞其音聲 而不壞耳根 其耳聰利故 悉能分別知
持是法華者 雖未得天耳 但用所生耳 功德已如是

已三 鼻根功德 (分三)

庚一、長行

復次常精進！若善男子、善女人，受持是經，若讀，若誦，若解說，若書寫，成就八百鼻功德。以是清淨鼻根，聞於三千大千世界上下內外種種諸香，須曼那華香、闍提華香、末利華香、薝蔔華香、波羅羅華香，赤蓮華香、青蓮華香、白蓮華香，華樹香、果樹香，栴檀香、沉水香、多摩羅跋香、多伽羅香，及千萬種和香，若末、若丸、若塗香，持是經者，於此間住，悉能分別。又復別知眾生之香，象香、馬香、牛羊等香，男香、女香、童子香、童女香，及草木叢林香，若近若遠，所有諸香，悉皆得聞。

，分別不錯。持是經者，雖住於此，亦聞天上諸天之香，波利質多羅、拘鞞陀羅樹香，及曼陀羅華香、摩訶曼陀羅華香、曼殊沙華香、摩訶曼殊沙華香、栴檀、沉水，種種末香，諸雜華香，如是等天香和合所出之香，無不聞知。又聞諸天身香，釋提桓因在勝殿上，五欲娛樂嬉戲時香，若在妙法堂上，為忉利諸天說法時香，若於諸園遊戲時香；及餘天等男女身香，皆悉遙聞。如是展轉，乃至梵世，上至有頂，諸天身香，亦皆聞之。並聞諸天所燒之香，及聲聞香、辟支佛香、菩薩香、諸佛身香，亦皆遙聞，知其所在。雖聞此香，然於鼻根不壞不錯。若欲分別為他人說，憶念不謬。

庚二、重頌

爾時，世尊欲重宣此義，而說偈言：

是人鼻清淨	於此世界中	若香若臭物	種種悉聞知
須曼那闍提	多摩羅栴檀	沉水及桂香	種種華果香
及諸眾生香	男子女人香	說法者遠住	聞香知所在
大勢轉輪王	小轉輪及子	群臣諸宮人	聞香知所在
身所著珍寶	及地中寶藏	轉輪王寶女	聞香知所在

諸天若聽法	天園林勝殿	天上諸宮殿	天上諸華等	種種諸瓔珞	地中眾伏藏	以聞香力故	以聞香力故	若有懷妊者	曠野險隘處	阿修羅男女	鐵圍山大海	諸山深險處	諸樹華果實	諸天若行坐	諸人嚴身具
或受五欲時	諸觀妙法堂	上中下差別	曼陀曼殊沙	無能識其價	金銀諸珍寶	知男女所念	知其初懷妊	未辨其男女	師子象虎狼	及其諸眷屬	地中諸眾生	梅檀樹華敷	及酥油香氣	遊戲及神變	衣服及瓔珞
來往行坐臥	在中而娛樂	眾寶華莊嚴	波利質多樹	聞香知貴賤	銅器之所盛	染欲癡恚心	成就不成就	無根及非人	野牛水牛等	鬪諍遊戲時	持經者聞香	眾生在中者	持經者住此	持是法華者	種種所塗香
聞香悉能知	聞香悉能知	聞香悉能知	聞香悉能知	出處及所在	聞香悉能知	亦知修善者	安樂產福子	聞香悉能知	聞香知所在	聞香皆能知	悉知其所在	聞香皆能知	悉知其所在	聞香悉能知	聞香知其身

天女所著衣	好華香莊嚴	周旋遊戲時	聞香悉能知
如是展轉上	乃至於梵世	入禪出禪者	聞香悉能知
光音遍淨天	乃至於有頂	初生及退沒	聞香悉能知
諸比丘眾等	於法常精進	若坐若經行	及讀誦經典
或在林樹下	專精而坐禪	持經者聞香	悉知其所在
菩薩志堅固	坐禪若讀誦	或為人說法	聞香悉能知
在在方世尊	一切所恭敬	愍眾而說法	聞香悉能知
眾生在佛前	聞經皆歡喜	如法而修行	聞香悉能知
雖未得菩薩	無漏法生鼻	而是持經者	先得此鼻相

己四 舌根功德 (分二)

庚一、長行

復次常精進！若善男子、善女人，受持是經，若讀，若誦，若解說，若書寫，得千二百舌功德。若好若醜，若美不美，及諸苦澀物，在其舌根，皆變成上味，如天甘露，無不美者。若以舌根，於大眾中，有所演說，出深妙聲，能入其心，皆令歡喜快樂。又諸天子、天女、釋梵諸天，聞是

深妙音聲，有所演說，言論次第，皆悉來聽。及諸龍、龍女，夜叉、夜叉女，乾闥婆、乾闥婆女，阿修羅、阿修羅女，迦樓羅、迦樓羅女，緊那羅、緊那羅女，摩睺羅伽、摩睺羅伽女，為聽法故，皆來親近，恭敬供養。及比丘、比丘尼、優婆塞、優婆夷，國王、王子、群臣眷屬，小轉輪王、大轉輪王、七寶千子、內外眷屬，乘其宮殿，俱來聽法，以是菩薩善說法故。婆羅門、居士、國內人民，盡其形壽，隨侍供養。又諸聲聞、辟支佛、菩薩、諸佛，常樂見之。是人所在方面，諸佛皆向其處說法，悉能受持一切佛法，又能出於深妙法音。

庚二、重頌

爾時，世尊欲重宣此義，而說偈言：

是人舌根淨 終不受惡味 其有所食噉 悉皆成甘露
以深淨妙聲 於大眾說法 以諸因緣喻 引導眾生心
聞者皆歡喜 設諸上供養
諸天龍夜叉 及阿修羅等 皆以恭敬心 而共來聽法

是說法之人	若欲以妙音	遍滿三千界	隨意即能至
大小轉輪王	及千子眷屬	合掌恭敬心	常來聽受法
諸天龍夜叉	羅剎毘舍闍	亦以歡喜心	常樂來供養
梵天王魔王	自在大自在	如是諸天眾	常來至其所
諸佛及弟子	聞其說法音	常念而守護	或時為現身

己五 身根功德 (分三)

庚一、長行

復次常精進！若善男子、善女人，受持是經，若讀，若誦，若解說，若書寫，得八百身功德。得清淨身、如淨琉璃，眾生喜見。其身淨故，三千大千世界眾生，生時死時，上下好醜，生善處惡處，悉於中現。及鐵圍山、大鐵圍山、彌樓山、摩訶彌樓山等諸山，及其中眾生，悉於中現。下至阿鼻地獄，上至有頂，所有及眾生，悉於中現。若聲聞、辟支佛、菩薩、諸佛說法，皆於身中，現其色像。

庚二、重頌

爾時，世尊欲重宣此義，而說偈言：

若持法華者	其身甚清淨	如彼淨琉璃	眾生皆喜見
又如淨明鏡	悉見諸色像	菩薩於淨身	皆見世所有
唯獨自明了	餘人所不見		
三千世界中	一切諸群萌	天人阿修羅	地獄鬼畜生
如是諸色像	皆於身中現		
諸天等宮殿	乃至於有頂	鐵圍及彌樓	摩訶彌樓山
諸大海水等	皆於身中現		
諸佛及聲聞	佛子菩薩等	若獨若在眾	說法悉皆現
雖未得無漏	法性之妙身	以清淨常體	一切於中現

己六 意根功德 (分二)

庚一、長行

復次常精進！若善男子、善女人，如來滅後，受持是經，若讀，若誦，若解說，若書寫，得千二百意功德。以是清淨意根，乃至聞一偈一句，

通達無量無邊之義，解是義已，能演說一句一偈，至於一月、四月，乃至一歲，諸所說法，隨其義趣，皆與實相不相違背。若說俗間經書、治世語言、資生業等，皆順正法。三千大千世界六趣眾生，心之所行，心所動作，心所戲論，皆悉知之，雖未得無漏智慧，而其意根清淨如此。是人有所思惟，籌量言說，皆是佛法，無不真實，亦是先佛經中所說。

庚二、重頌

爾時，世尊欲重宣此義，而說偈言：

是人意清淨	明利無濁穢	以此妙意根	知上中下法
乃至聞一偈	通達無量義	次第如法說	月四月至歲
是世界內外	一切諸眾生	若天龍及人	夜叉鬼神等
其在六趣中	所念若干種	持法華之報	一時皆悉知
十方無數佛	百福莊嚴相	為眾生說法	悉聞能受持
思惟無量義	說法亦無量	終始不忘錯	以持法華故
悉知諸法相	隨義識次第	達名字語言	如所知演說
此人有所說	皆是先佛法	以演此法故	於眾無所畏

持法華經者 意根淨若斯 雖未得無漏 先有如是相
是人持此經 安住希有地 為一切眾生 歡喜而愛敬
能以千萬種 善巧之語言 分別而說法 持法華經故

妙法蓮華經 卷六

常不輕菩薩品第二十



丁三、引信毀福罪證以勸流通(分二)

戊一、長行(分二)

己一、雙指前品所說罪福

爾時，佛告得大勢菩薩摩訶薩：汝今當知！若比丘、比丘尼、優婆塞、優婆夷，持法華經者，若有惡口、罵詈、誹謗，獲大罪報，如前所說。其所得功德，如向所說，眼耳鼻舌身意清淨。

己二、雙開今品往昔信毀(分二)

庚一、明事本(分三)

辛一、最初一佛

得大勢！乃往古昔，過無量無邊不可思議阿僧祇劫，有佛名威音王如來、應供、正遍知、明行足、善逝、世間解、無上士、調御丈夫、天人師、佛、世尊。劫名離衰，國名大成。其威音王佛，於彼世中，為天、人、阿修羅說法。為求聲聞者，說應四諦法，度生老病死，究竟涅槃；為求辟支佛者，說應十二因緣法；為諸菩薩，因阿耨多羅三藐三菩提，說應六波羅蜜法，究竟佛慧。

得大勢！是威音王佛，壽四十萬億那由他恆河沙劫；正法住世劫數，如一閻浮提微塵，像法住世劫數，如四天下微塵。其佛饒益眾生已，然後滅度。

辛二、次第二萬億佛

正法像法滅盡之後，於此國土，復有佛出，亦號威音王如來、應供、正遍知、明行足、善逝、世間解、無上士、調御丈夫、天人師、佛、世尊。如是次第有二萬億佛，皆同一號。

庚二、明本事(分二)

辛一、初標時節人名

最初威音王如來，既已滅度，正法滅後，於像法中，增上慢比丘有大勢力。爾時，有一菩薩比丘，名常不輕。

辛二、徵釋不輕之名(分二)

壬一、不輕之行

得大勢！以何因緣，名常不輕？是比丘凡有所見，若比丘、比丘尼、優婆塞、優婆夷，皆悉禮拜讚歎，而作是言：我深敬汝等，不敢輕慢；所以者何？汝等皆行菩薩道，當得作佛。而是比丘不專讀誦經典，但行禮拜，乃至遠見四眾，亦復故往禮拜讚歎，而作是言：我不敢輕於汝等，汝等皆當作佛。

壬二、得名之由

四眾之中，有生瞋恚，心不淨者，惡口罵詈言：是無智比丘，從何所來？自言我不輕汝，而與我等授記，當得作佛。我等不用如是虛妄授記。如此經歷多年，常被罵詈，不生瞋恚，常作是言：汝當作佛。說是語時，眾人或以杖木瓦石而打擲之，避走遠住，猶高聲唱言：我不敢輕於汝等，汝等皆當作佛。以其常作是語故，增上慢比丘、比丘尼、優婆塞、優婆夷，號之為常不輕。

己三、雙明信毀果報 (分二)

庚一、明信者果報 (分二)

辛一、正明果報 (分三)

壬一、現報

是比丘臨欲終時，於虛空中，具聞威音王佛，先所說法華經二十千萬億偈，悉能受持，即得如上眼根清淨，耳鼻舌身意根清淨。得是六根清淨已，更增壽命二百萬億那由他歲，廣為人說是法華經。

於時增上慢四眾，比丘、比丘尼、優婆塞、優婆夷，輕賤是人為作不輕名者，見其得大神通力、樂說辯力、大善寂力，聞其所說，皆信伏隨從。

壬二、生報

是菩薩復化千萬億眾，令住阿耨多羅三藐三菩提。命終之後，得值二千億佛，皆號日月燈明，於其法中，說是法華經。

壬三、後報

以是因緣，復值二千億佛，同號雲自在燈王，於此諸佛法中，受持讀誦，為諸四眾說此經典故，得是常眼清淨，耳鼻舌身意諸根清淨，於四眾中說法，心無所畏。

得大勢！是常不輕菩薩摩訶薩，供養如是若干諸佛，恭敬尊重讚歎，種諸善根，於後復值千萬億佛，亦於諸佛法中，說是經典，功德成就，當得作佛。

辛二、結會古今

得大勢！於意云何？爾時常不輕菩薩，豈異人乎？則我身是！若我於宿世，不受持讀誦此經，為他人說者，不能疾得阿耨多羅三藐三菩提。我於先佛所，受持讀誦此經，為人說故，疾得阿耨多羅三藐三菩提。

庚二、明毀者果報 (分二)

辛一、正明果報

得大勢！彼時四眾，比丘、比丘尼、優婆塞、優婆夷，以瞋恚意，輕賤我故，二百億劫常不值佛、不聞法、不見僧，千劫於阿鼻地獄受大苦惱。畢是罪已，復遇常不輕菩薩，教化阿耨多羅三藐三菩提。

辛二、結會果報(分二)

壬一、結會

得大勢，於汝意云何？爾時，四眾常輕是菩薩者，豈異人乎？今此會中，跋陀婆羅等五百菩薩，師子月等五百比丘，尼思佛等五百優婆塞，皆於阿耨多羅三藐三菩提不退轉者是。

壬二、勸持

得大勢！當知是法華經，大饒益諸菩薩摩訶薩，能令至於阿耨多羅三藐三菩提。是故諸菩薩摩訶薩，於如來滅後，常應受持、讀誦、解說、書寫是經。

戊二、重頌(分三)

己一、頌雙開今品信毀(分三)

庚一、頌事緣之本

爾時，世尊欲重宣此義，而說偈言：

過去有佛 號威音王 神智無量 將導一切

天人龍神 所共供養

庚二、頌時節人名

是佛滅後 法欲盡時 有一菩薩 名常不輕
時諸四眾 計著於法

庚三、頌不輕之行

不輕菩薩 往到其所 而語之言
我不輕汝 汝等行道 皆當作佛
諸人聞已 輕毀罵詈 不輕菩薩 能忍受之

己二、頌雙明信毀果報 (分三)

庚一、頌信毀果報

其罪畢已 臨命終時 得聞此經 六根清淨
神通力故 增益壽命 復為諸人 廣說是經
諸著法眾 皆蒙菩薩 教化成就 令住佛道
不輕命終 值無數佛 說是經故 得無量福
漸具功德 疾成佛道

庚二、頌結會古今

彼時不輕 則我身是 時四部眾 著法之者
聞不輕言 汝當作佛 以是因緣 值無數佛
此會菩薩 五百之眾 並及四部 清信士女
今於我前 聽法者是

庚三、頌功德勸持

我於前世 勸是諸人 聽受斯經 第一之法
開示教人 令住涅槃 世世受持 如是經典
億億萬劫 至不可議 時乃得聞 是法華經
億億萬劫 至不可議 諸佛世尊 時說是經
是故行者 於佛滅後 聞如是經 勿生疑惑
應當一心 廣說此經 世世值佛 疾成佛道

妙法蓮華經 卷六

如來神力品第二十一



甲三、流通迹本二門

乙一、明付囑流通(分二)

丙一、菩薩受命弘經(分二)

丁一、長行(分二)

戊一、菩薩受命

爾時，千世界微塵等菩薩摩訶薩從地湧出者，皆於佛前，一心合掌，瞻仰尊顏，而白佛言：世尊！我等於佛滅後，世尊分身所在國土滅度之處，當廣說此經。所以者何？我等亦自欲得是真淨大法，受持、讀誦、解說、書寫，而供養之。

戊二、佛現神力(分五)

己一、放光動地

爾時，世尊於文殊師利等，無量百千萬億舊住娑婆世界菩薩摩訶薩，及諸比丘、比丘尼、優婆塞、優婆夷、天、龍、夜叉、乾闥婆、阿修羅、迦樓羅、緊那羅、摩睺羅伽、人非人等，一切眾前，現大神力，出廣長舌，上至梵世；一切毛孔，放於無量無數色光，皆悉遍照十方世界。眾寶樹下，師子座上諸佛，亦復如是，出廣長舌，放無量光。

釋迦牟尼佛，及寶樹下諸佛，現神力時，滿百千歲，然後還攝舌相。一時警效，俱共彈指，是二音聲，遍至十方諸佛世界，地皆六種震動。

己二、普見大會

其中眾生，天龍、夜叉、乾闥婆、阿修羅、迦樓羅、緊那羅、摩睺羅伽、人非人等，以佛神力故，皆見此娑婆世界，無量無邊百千萬億眾寶樹下師子座上諸佛；及見釋迦牟尼佛共多寶如來，在寶塔中坐師子座；又見無量無邊百千萬億菩薩摩訶薩，及諸四眾，恭敬圍繞釋迦牟尼佛。既見是已，皆大歡喜，得未曾有。

己三、諸天稱歎

即時，諸天於虛空中，高聲唱言：過此無量無邊百千萬億阿僧祇世界，有國名娑婆，是中有佛，名釋迦牟尼。今為諸菩薩摩訶薩說大乘經，名妙法蓮華，教菩薩法，佛所護念。汝等當深心隨喜，亦當禮拜供養釋迦牟尼佛。

己四、眾生歸命

彼諸眾生，聞虛空中聲已，合掌向娑婆世界，作如是言：南無釋迦牟尼佛！南無釋迦牟尼佛！以種種華、香、瓔珞、幡蓋，及諸嚴身之具，珍寶妙物，皆共遙散娑婆世界。所散諸物，從十方來，譬如雲集，變成寶帳，遍覆此間諸佛之上。

己五、世界合一

於時，十方世界通達無礙，如一佛土。

戊三、結要勸持(分三)

己一、稱歎付囑

爾時，佛告上行等菩薩大眾：諸佛神力，如是無量無邊，不可思議。若我以是神力，於無量無邊百千萬億阿僧祇劫，為囑累故，說此經功德，猶不能盡。

己二、結要付囑

以要言之，如來一切所有之法，如來一切自在神力，如來一切秘要之

藏，如來一切甚深之事，皆於此經宣示顯說。

己三、勸持付囑

是故汝等於如來滅後，應一心受持、讀誦、解說、書寫，如說修行。所在國土，若有受持、讀誦、解說、書寫，如說修行，若經卷所住之處，若於園中，若於林中，若於樹下，若於僧坊，若白衣舍，若在殿堂，若山谷曠野，是中皆應起塔供養。所以者何？當知是處，即是道場。諸佛於此，得阿耨多羅三藐三菩提；諸佛於此，轉於法輪；諸佛於此，而般涅槃。

丁二、重頌

戊一、頌如來神力

爾時，世尊欲重宣此義，而說偈言：

諸佛救世者	住於大神通	為悅眾生故	現無量神力
舌相至梵天	身放無數光	為求佛道者	現此希有事
諸佛警歎聲	及彈指之聲	周聞十方國	地皆六種動
以佛滅度後	能持是經故	諸佛皆歡喜	現無量神力

戊二、頌稱歎勸持(分二)

己一、頌稱歎

囑累是經故 讚美受持者 於無量劫中 猶故不能盡
是人之功德 無邊無有窮 如十方虛空 不可得邊際

己二、頌勸持(分四)

庚一、持一切法

能持是經者 則為已見我 亦見多寶佛 及諸分身者
又見我今日 教化諸菩薩

庚二、自在神力

能持是經者 令我及分身 滅度多寶佛 一切皆歡喜
十方現在佛 並過去未來 亦見亦供養 亦令得歡喜

庚三、秘要之藏

諸佛坐道場 所得秘要法 能持是經者 不久亦當得

庚四、甚深之事

能持是經者	於諸法之義	名字及言辭	樂說無窮盡
如風於空中	一切無障礙	於如來滅後	知佛所說經
因緣及次第	隨義如實說	如日月光明	能除諸幽冥
斯人行世間	能滅眾生闇	教無量菩薩	畢竟住一乘
是故有智者	聞此功德利	於我滅度後	應受持斯經
是人於佛道	決定無有疑		

妙法蓮華經 卷六

囑累品第二十二



丙二、如來摩頂付囑(分二)

丁一、付囑受命(分三)

戊一、如來付囑(分三)

己一、正明付囑

爾時，釋迦牟尼佛從法座起，現大神力，以右手摩無量菩薩摩訶薩頂，而作是言：我於無量百千萬億阿僧祇劫，修習是難得阿耨多羅三藐三菩提法，今以付囑汝等，汝等應當一心流布此法，廣令增益。如是三摩諸菩薩摩訶薩頂，而作是言：我於無量百千萬億阿僧祇劫，修習是難得阿耨多羅三藐三菩提法，今以付囑汝等，汝等當受持讀誦，廣宣此法，令一切眾生，普得聞知。

己二、釋付囑意

所以者何？如來有大慈悲，無諸慳吝，亦無所畏，能與眾生佛之智慧、如來智慧、自然智慧，如來是一切眾生之大施主。汝等亦應隨學如來之法，勿生慳吝。

己三、誠勉隨宜

於未來世，若有善男子、善女人，信如來智慧者，當為演說此法華經，使得聞知，為令其人得佛慧故。若有眾生不信受者，當於如來餘深法中，示教利喜。汝等若能如是，則為已報諸佛之恩。

戊二、菩薩領受

時諸菩薩摩訶薩，聞佛作是說已，皆大歡喜，遍滿其身，益加恭敬，曲躬低頭，合掌向佛，俱發聲言：如世尊敕，當具奉行，唯然世尊！願不有慮。諸菩薩摩訶薩眾，如是三反，俱發聲言：如世尊敕，當具奉行，唯然世尊！願不有慮。

戊三、事畢唱散

爾時，釋迦牟尼佛令十方來諸分身佛，各還本土，而作是言：諸佛各隨所安，多寶佛塔還可如故。

丁二、時眾歡喜

說是語時，十方無量分身諸佛，坐寶樹下，師子座上者，及多寶佛，並上行等無邊阿僧祇菩薩大眾，舍利弗等聲聞四眾，及一切世間天、人、阿修羅等，聞佛所說，皆大歡喜。

妙法蓮華經 卷六

藥王菩薩本事品第二十三



乙二、約化他勸流通 (分四)

丙一、勗弘法之師 (分四)

丁一、宿王請問

爾時，宿王華菩薩白佛言：世尊！藥王菩薩云何遊於娑婆世界？

世尊！是藥王菩薩，有若干百千萬億那由他難行苦行？

善哉！世尊！願少解說。

諸天、龍神、夜叉、乾闥婆、阿修羅、迦樓羅、緊那羅、摩睺羅伽、人非人等，又他國土諸來菩薩，及此聲聞眾，聞皆歡喜。

丁二、如來垂答 (分二)

戊一、正答苦行 (分二)

己一、明事本

爾時，佛告宿王華菩薩：乃往過去無量恆河沙劫，有佛號日月淨明德如來、應供、正遍知、明行足、善逝、世間解、無上士、調御丈夫、天人師、佛、世尊。

其佛有八十億大菩薩摩訶薩，七十二恆河沙大聲聞眾，佛壽四萬二千劫，菩薩壽命亦等。彼國無有女人、地獄、餓鬼、畜生、阿修羅等，及以

諸難。地平如掌，琉璃所成，寶樹莊嚴，寶帳覆上，垂寶華幡，寶瓶香爐，周徧國界。七寶為臺，一樹一臺，其樹去臺，盡一箭道。此諸寶樹，皆有菩薩、聲聞，而坐其下。諸寶臺上，各有百億諸天，作天伎樂，歌歎於佛，以為供養。

己二、明本事 (分二)

庚一、彼佛說法

爾時，彼佛為一切眾生喜見菩薩，及眾菩薩、諸聲聞眾，說法華經。

庚二、廣修供養 (分二)

辛一、現生供養 (分二)

壬一、修行得法

是一切眾生喜見菩薩，樂習苦行，於日月淨明德佛法中，精進經行，一心求佛，滿萬二千歲已，得現一切色身三昧。

壬二、作念報恩 (分二)

癸一、三昧供養

得此三昧已，心大歡喜，即作念言：我得現一切色身三昧，皆是得聞法華經力，我今當供養日月淨明德佛，及法華經。即時入是三昧，於虛空中，雨曼陀羅華、摩訶曼陀羅華、細末堅黑栴檀，滿虛空中，如雲而下，又雨海彼岸栴檀之香，此香六銖，價值娑婆世界，以供養佛。

癸二、燒身供養(分三)

子一、燒身

作是供養已，從三昧起，而自念言：我雖以神力供養於佛，不如以身供養。即服諸香，栴檀、薰陸、兜羅婆、畢力迦、沉水、膠香，又飲薝蔔諸華香油，滿千二百歲已。香油塗身，於日月淨明德佛前，以天寶衣而自纏身，灌諸香油，以神通力願而自然身，光明遍照八十億恆河沙世界。

子二、佛讚

其中諸佛同時讚言：善哉！善哉！善男子！是真精進，是真法供養如來。若以華、香、瓔珞、燒香、末香、塗香、天繒、幡蓋及海彼岸栴檀之香，如是等種種諸物供養，所不能及。假使國城妻子布施，亦所不及。

善男子！是名第一之施，於諸施中，最尊最上，以法供養諸如來故。作是語已，而各默然。

子三、時節

其身火燃千二百歲，過是已後，其身乃盡。

辛二、次生供養（分五）

壬一、生在王家

一切眾生喜見菩薩作如是法供養已，命終之後，復生日月淨明德佛國中，於淨德王家結跏趺坐，忽然化生。

壬二、說昔本事

即為其父而說偈言：

大王今當知 我經行彼處 即時得一切 現諸身三昧
勤行大精進 捨所愛之身 供養於世尊 為求無上慧

說是偈已，而白父言：日月淨明德佛，今故現在，我先供養佛已，得解一切眾生語言陀羅尼，復聞是法華經八百千萬億那由他、甄迦羅、頻婆

羅、阿閼婆等偈。大王！我今當還供養此佛。

壬三、往詣佛所

白已，即坐七寶之臺，上升虛空，高七多羅樹，往到佛所，頭面禮足，合十指爪，以偈讚佛：

容顏甚奇妙 光明照十方 我適曾供養 今復還親覲

爾時，一切眾生喜見菩薩說是偈已，而白佛言：

世尊！世尊！猶故在世。

壬四、如來付囑

爾時，日月淨明德佛告一切眾生喜見菩薩：善男子！我涅槃時到，滅盡時至，汝可安施床座，我於今夜，當般涅槃。又敕一切眾生喜見菩薩：善男子！我以佛法，囑累於汝，及諸菩薩大弟子，並阿耨多羅三藐三菩提法，亦以三千大千七寶世界，諸寶樹寶臺，及給侍諸天，悉付於汝。我滅度後，所有舍利，亦付囑汝，當令流布，廣設供養，應起若干千塔。如是日月淨明德佛，敕一切眾生喜見菩薩已，於夜後分，入於涅槃。

壬五、奉命任持(分四)

癸一、滅後起塔

爾時，一切眾生喜見菩薩見佛滅度，悲感懊惱，戀慕於佛，即以海此岸梅檀為積，供養佛身，而以燒之。火滅已後，收取舍利，作八萬四千寶瓶，以起八萬四千塔，高三世界，表剎莊嚴，垂諸幡蓋，懸眾寶鈴。

癸二、燒臂供養

爾時，一切眾生喜見菩薩復自念言：我雖作是供養，心猶未足，我今當更供養舍利。便語諸菩薩、大弟子，及天龍夜叉等一切大眾：汝等當一心念，我今供養日月淨明德佛舍利。作是語已，即於八萬四千塔前，燃百福莊嚴臂，七萬二千歲，而以供養。

癸三、時眾獲益

令無數求聲聞眾、無量阿僧祇人，發阿耨多羅三藐三菩提心，皆使得住現一切色身三昧。

癸四、燒臂還復

爾時，諸菩薩、天、人、阿修羅等，見其無臂，憂惱悲哀，而作是言：此一切眾生喜見菩薩，是我等師，教化我者，而今燒臂，身不具足。

於時一切眾生喜見菩薩，於大眾中，立此誓言：我捨兩臂，必當得佛金色之身，若實不虛，令我兩臂還復如故。作是誓已，自然還復，由斯菩薩福德智慧淳厚所致。

當爾之時，三千大千世界六種震動，天雨寶華，一切人天得未曾有。

庚三、結會古今

佛告宿王華菩薩：於汝意云何？一切眾生喜見菩薩，豈異人乎？今藥王菩薩是也。其所捨身布施，如是無量百千萬億那由他數。

戊二、歎經功深（分三）

己一、歎能持經人

宿王華！若有發心欲得阿耨多羅三藐三菩提者，能燃手指，乃至足一指，供養佛塔，勝以國城妻子，及三千大千國土，山林河池，諸珍寶物，而供養者。若復有人，以七寶滿三千大千世界，供養於佛，及大菩薩、辟

支佛、阿羅漢，是人所得功德，不如受持此法華經，乃至一四句偈，其福最多。

己二、歎所持經法 (分二)

庚一、歎法體

宿王華！譬如一切川流江河諸水之中，海為第一；此法華經亦復如是，於諸如來所說經中，最為深大。又如土山、黑山、小鐵圍山、大鐵圍山，及十寶山，眾山之中，須彌山為第一；此法華經亦復如是，於諸經中最高為其上。又如眾星之中，月天子最為第一；此法華經亦復如是，於千萬億種諸經法中，最為照明。又如日天子，能除諸闇；此經亦復如是，能破一切不善之闇。又如諸小王中，轉輪聖王最為第一；此經亦復如是，於眾經中，最為其尊。又如帝釋，於三十三天中王；此經亦復如是，諸經中王。又如大梵天王，一切眾生之父；此經亦復如是，一切賢聖，學無學，及發菩薩心者之父。又如一切凡夫人中，須陀洹、斯陀含、阿那含、阿羅漢、辟支佛為第一；此經亦復如是，一切如來所說，若菩薩所說，若聲聞所說，諸經法中，最為第一。有能受持是經典者，亦復如是，於一切眾生中，

亦為第一。一切聲聞、辟支佛中，菩薩為第一；此經亦復如是，於一切諸經法中、最為第一。如佛為諸法王；此經亦復如是，諸經中王。

庚二、歎法用

宿王華！此經能救一切眾生者，此經能令一切眾生離諸苦惱，此經能大饒益一切眾生，充滿其願。如清涼池，能滿一切諸渴乏者；如寒者得火，如裸者得衣，如商人得主，如子得母，如渡得船，如病得醫，如闇得燈，如貧得寶，如民得王，如賈客得海，如炬除闇；此法華經亦復如是，能令眾生離一切苦、一切病痛，能解一切生死之縛。

己三、明持經福德（分二）

庚一、明持全經福

若人得聞此法華經，若自書、若使人書，所得功德，以佛智慧，籌量多少，不得其邊。若書是經卷，華香、瓔珞、燒香、末香、塗香，幡蓋、衣服、種種之燈、酥燈、油燈、諸香油燈、薈蔔油燈、須曼那油燈、波羅羅油燈、婆利師迦油燈、那婆摩利油燈供養，所得功德，亦復無量。

宿王華！若有人聞是藥王菩薩本事品者，亦得無量無邊功德。若有女人，聞是藥王菩薩本事品，能受持者，盡是女身，後不復受。

若如來滅後，後五百歲中，若有女人，聞是經典，如說修行，於此命終，即往安樂世界，阿彌陀佛、大菩薩眾，圍繞住處，生蓮華中，寶座上，不復為貪欲所惱，亦復不為瞋恚愚癡所惱，亦復不為憍慢嫉妬諸垢所惱，得菩薩神通，無生法忍。得是忍已，眼根清淨，以是清淨眼根，見七百萬二千億那由他恆河沙等諸佛如來。

是時諸佛遙共讚言：

善哉！善哉！善男子！汝能於釋迦牟尼佛法中，受持讀誦，思惟是經，為他人說，所得福德，無量無邊，火不能焚，水不能漂，汝之功德，千佛共說，不能令盡。汝今已能破諸魔賊，壞生死軍，諸餘怨敵，皆悉摧滅。善男子！百千諸佛，以神通力，共守護汝，於一切世間天人之中，無如汝者，唯除如來，其諸聲聞、辟支佛，乃至菩薩，智慧禪定，無有與汝等者。

宿王華！此菩薩成就如是功德智慧之力。若有人聞是藥王菩薩本事品，能隨喜讚善者，是人現世口中，常出青蓮華香，身毛孔中，常出牛頭栴檀之香，所得功德，如上所說。

辛二、付囑

是故宿王華！以此藥王菩薩本事品，囑累於汝。我滅度後，後五百歲中，廣宣流布於閻浮提，無令斷絕，惡魔、魔民、諸天、龍、夜叉、鳩槃荼等，得其便也。

宿王華！汝當以神通之力，守護是經。所以者何？此經則為閻浮提人病之良藥；若人有病，得聞是經，病即消滅，不老不死。

宿王華！汝若見有受持是經者，應以青蓮華盛滿末香，供散其上，散已，作是念言：此人不久必當取草坐於道場，破諸魔軍，當吹法螺，擊大法鼓，度脫一切眾生老病死海。是故求佛道者，見有受持是經典人，應當如是生恭敬心。

丁三、聞法利益

說是藥王菩薩本事品時，八萬四千菩薩，得解一切眾生語言陀羅尼。

丁四、多寶稱讚

多寶如來於寶塔中，讚宿王華菩薩言：

善哉！善哉！宿王華！汝成就不可思議功德，乃能問釋迦牟尼佛如此之事，利益無量一切眾生。

妙法蓮華經 卷七

妙音菩薩品第二十四



丙二、勗受法弟子

丁一、妙音說法(分六)

戊一、放光東照

爾時，釋迦牟尼佛放大人相肉髻光明，及放眉間白毫相光，遍照東方百八萬億那由他恆河沙等諸佛世界。

過是數已，有世界名淨光莊嚴，其國有佛，號淨華宿王智如來、應供、正遍知、明行足、善逝、世間解、無上士、調御丈夫、天人師、佛、世尊，為無量無邊菩薩大眾，恭敬圍繞，而為說法。

釋迦牟尼佛白毫光明，遍照其國。

戊二、奉命西來(分二)

己一、發來之緣(分五)

庚一、經家敘德

爾時，一切淨光莊嚴國中，有一菩薩，名曰妙音，久已植眾德本，供養親近無量百千萬億諸佛，而悉成就甚深智慧，得妙幢相三昧、法華三昧、淨德三昧、宿王戲三昧、無緣三昧、智印三昧、解一切眾生語言三昧、集一切功德三昧、清淨三昧、神通遊戲三昧、慧炬三昧、莊嚴王三昧、淨

光明三昧、淨藏三昧、不共三昧、日旋三昧，得如是等百千萬億恆河沙等諸大三昧。

庚二、被照辭佛

釋迦牟尼佛光照其身，即白淨華宿王智佛言：

世尊！我當往詣娑婆世界，禮拜親近供養釋迦牟尼佛，及見文殊師利法王子菩薩、藥王菩薩、勇施菩薩、宿王華菩薩、上行意菩薩、莊嚴王菩薩、藥上菩薩。

庚三、彼佛垂誠

爾時，淨華宿王智佛告妙音菩薩：

汝莫輕彼國，生下劣想。善男子！彼娑婆世界，高下不平，土石諸山，穢惡充滿，佛身卑小，諸菩薩眾，其形亦小。而汝身四萬二千由旬，我身六百八十萬由旬，汝身第一端正，百千萬福，光明殊妙；是故汝往，莫輕彼國，若佛菩薩及國土，生下劣想。

庚四、妙音受旨

妙音菩薩白其佛言：世尊！我今詣娑婆世界，皆是如來之力，如來神通遊戲，如來功德智慧莊嚴。

庚五、先現來相（分六）

辛一、妙音現瑞

於是妙音菩薩不起於座，身不動搖，而入三昧。以三昧力，於耆闍崛山，去法座不遠，化作八萬四千眾寶蓮華，閻浮檀金為莖，白銀為葉，金剛為鬚，甄叔迦寶以為其臺。

辛二、文殊請問

爾時，文殊師利法王子見是蓮華，而白佛言：

世尊！是何因緣，先現此瑞，有若干千萬蓮華，閻浮檀金為莖，白銀為葉，金剛為鬚，甄叔迦寶以為其臺？

辛三、如來垂答

爾時，釋迦牟尼佛告文殊師利：

是妙音菩薩摩訶薩，欲從淨華宿王智佛國，與八萬四千菩薩圍繞而來，至此娑婆世界，供養親近禮拜於我，亦欲供養聽法華經。

辛四、文殊請見

文殊師利白佛言：

世尊！是菩薩種何善本，修何功德，而能有是大神通力？行何三昧？願為我等說是三昧名字，我等亦欲勤修行之。行此三昧，乃能見是菩薩色相大小，威儀進止，惟願世尊以神通力，彼菩薩來，令我得見。

辛五、推功多寶

爾時，釋迦牟尼佛告文殊師利：

此久滅度多寶如來，當為汝等而現其相。

辛六、多寶命來

時多寶佛告彼菩薩：

善男子來！文殊師利法王子欲見汝身。

己二、正明發來 (分六)

庚一、眷屬經歷

於時，妙音菩薩於彼國沒，與八萬四千菩薩，俱共發來。所經諸國，六種震動，皆悉雨於七寶蓮華，百千天樂，不鼓自鳴。

庚二、敘相登台

是菩薩目如廣大青蓮華葉，正使和合百千萬月，其面貌端正，復過於此。身真金色，無量百千功德莊嚴，威德熾盛，光明照耀，諸相具足，如那羅延堅固之身。入七寶臺，上升虛空，去地七多羅樹，諸菩薩眾恭敬圍繞，而來詣此娑婆世界耆闍崛山。

庚三、問訊傳旨

到已，下七寶臺，以價值百千瓔珞，持至釋迦牟尼佛所，頭面禮足，奉上瓔珞，而白佛言：

世尊！淨華宿王智佛問訊世尊：少病少惱，起居輕利，安樂行不？四大調和不？世事可忍不？眾生易度不？無多貪欲、瞋恚、愚癡、嫉妬、慳慢不？無不孝父母、不敬沙門、邪見不善心、不攝五情不？世尊！眾生能

降伏諸魔怨不？久滅度多寶如來在七寶塔中，來聽法不？又問訊多寶如來：安隱少惱，堪忍久住不？

庚四、請見多寶

世尊！我今欲見多寶佛身，惟願世尊，示我令見。

庚五、世尊為通

爾時，釋迦牟尼佛語多寶佛：是妙音菩薩欲得相見。

庚六、塔中稱喜

時多寶佛告妙音言：

善哉！善哉！汝能為供養釋迦牟尼佛，及聽法華經，並見文殊師利等，故來至此。

戊三、十方弘經

己一、問答善根神力 (分二)

庚一、華德疑問

爾時，華德菩薩白佛言：

世尊！是妙音菩薩，種何善根，修何功德，有是神力？

庚二、如來垂答（分二）

辛一、正答善根功德

佛告華德菩薩：

過去有佛，名雲雷音王，多陀阿伽度阿羅訶三藐三佛陀，國名現一切世間，劫名喜見。妙音菩薩於萬二千歲，以十萬種伎樂，供養雲雷音王佛，並奉上八萬四千七寶鉢。以是因緣果報，今生淨華宿王智佛國，有是神力。華德！於汝意云何？

爾時，雲雷音王佛所，妙音菩薩伎樂供養，奉上寶器者，豈異人乎？今此妙音菩薩摩訶薩是。

華德！是妙音菩薩，已曾供養親近無量諸佛，久植德本，又值恆河沙等百千萬億那由他佛。

辛二、廣明神力應化

華德！汝但見妙音菩薩其身在此，而是菩薩現種種身，處處為諸眾生

說是經典，或現梵王身，或現帝釋身，或現自在天身，或現大自在天身，或現天大將軍身，或現毘沙門天王身，或現轉輪聖王身，或現諸小王身，或現長者身，或現居士身，或現宰官身，或現婆羅門身，或現比丘、比丘尼、優婆塞、優婆夷身，或現長者居士婦女身，或現宰官婦女身，或現婆羅門婦女身，或現童男童女身，或現天龍、夜叉、乾闥婆、阿修羅、迦樓羅、緊那羅、摩睺羅伽、人非人等身，而說是經。諸有地獄、餓鬼、畜生，及眾難處，皆能救濟，乃至於王後宮，變為女身，而說是經。

華德！是妙音菩薩，能救護娑婆世界諸眾生者，是妙音菩薩如是種種變化現身，在此娑婆國土，為諸眾生說是經典，於神通變化智慧無所損減。是菩薩以若干智慧，明照娑婆世界，令一切眾生，各得所知；於十方恆河沙世界中，亦復如是。

若應以聲聞形得度者，現聲聞形而為說法；

應以辟支佛形得度者，現辟支佛形而為說法；

應以菩薩形得度者，現菩薩形而為說法；

應以佛形得度者，即現佛形而為說法。

如是種種，隨所應度而為現形，乃至應以滅度而得度者，示現滅度。

華德！妙音菩薩摩訶薩，成就大神通智慧之力，其事如是。

己二、問答住何三昧（分二）

庚一、問

爾時，華德菩薩白佛言：

世尊！是妙音菩薩深種善根。

世尊！是菩薩住何三昧，而能如是在所變現，度脫眾生？

庚二、答

佛告華德菩薩：

善男子！其三昧名現一切色身，妙音菩薩住是三昧中，能如是饒益無量眾生。

戊四、二土得益

說是妙音菩薩品時，與妙音菩薩俱來者，八萬四千人，皆得現一切色身三昧；此娑婆世界無量菩薩，亦得是三昧及陀羅尼。

戊五、還歸本國

爾時，妙音菩薩摩訶薩，供養釋迦牟尼佛及多寶佛塔已，還歸本土，所經諸國，六種震動，雨寶蓮華，作百千萬億種種伎樂。既到本國，與八萬四千菩薩圍繞，至淨華宿王智佛所，白佛言：世尊！我到娑婆世界，饒益眾生，見釋迦牟尼佛，及見多寶佛塔，禮拜供養，又見文殊師利法王子菩薩，及見藥王菩薩、得勤精進力菩薩、勇施菩薩等，亦令是八萬四千菩薩，得現一切色身三昧。

戊六、聞品進道

說是妙音菩薩來往品時，四萬二千天子得無生法忍，華德菩薩得法華三昧。

妙法蓮華經 卷七

觀世音菩薩普門品第二十五



丁二、普門圓應 (分二)

戊一、問答顯德 (分二)

己一、長行 (分二)

庚一、初番問答 (分二)

辛一、問

爾時，無盡意菩薩即從座起，偏袒右肩，合掌向佛，而作是言：
世尊！觀世音菩薩，以何因緣，名觀世音？

辛二、答 (分三)

壬一、總答

佛告無盡意菩薩：

善男子！若有無量百千萬億眾生，受諸苦惱，聞是觀世音菩薩，一心稱名，觀世音菩薩即時觀其音聲，皆得解脫。

壬二、別答 (分三)

癸一、約口業機明應 (分二)

子一、免除七難 (分七)

丑一、火難

若有持是觀世音菩薩名者，設入大火，火不能燒，由是菩薩威神力故。

丑二、水難

若為大水所漂，稱其名號，即得淺處。

丑三、羅剎難

若有百千萬億眾生，為求金、銀、琉璃、磈磈、瑪瑙、珊瑚、琥珀、真珠等寶，入於大海，假使黑風吹其船舫，漂墮羅剎鬼國，其中若有乃至一人，稱觀世音菩薩名者，是諸人等，皆得解脫羅剎之難。以是因緣，名觀世音。

丑四、刀杖難

若復有人，臨當被害，稱觀世音菩薩名者，彼所執刀杖，尋段段壞，而得解脫。

丑五、惡鬼難

若三千大千國土，滿中夜叉、羅剎，欲來惱人，聞其稱觀世音菩薩名

者，是諸惡鬼尚不能以惡眼視之，況復加害。

丑六、枷鎖難

設復有人，若有罪，若無罪，杻械、枷鎖檢繫其身，稱觀世音菩薩名者，皆悉斷壞，即得解脫。

丑七、怨賊難

若三千大千國土，滿中怨賊，有一商主，將諸商人，齎持重寶，經過險路，其中一人作是唱言：諸善男子！勿得恐怖！汝等應當一心稱觀世音菩薩名號，是菩薩能以無畏施於眾生；汝等若稱名者，於此怨賊當得解！眾商人聞，俱發聲言：南無觀世音菩薩！稱其名故，即得解脫。

子二、結歎

無盡意！觀世音菩薩摩訶薩，威神之力，巍巍如是。

子一、遠離三毒

若有眾生多於婬欲，常念恭敬觀世音菩薩，便得離欲；若多瞋恚，常念恭敬觀世音菩薩，便得離瞋；若多愚癡，常念恭敬觀世音菩薩，便得離癡。

子二、結歎

無盡意！觀世音菩薩有如是等大威神力，多所饒益，是故眾生常應心念。

癸三、約身業機明應（分二）

子一、成就二求

若有女人，設欲求男，禮拜供養觀世音菩薩，便生福德智慧之男；設欲求女，便生端正有相之女。宿植德本，眾人愛敬。

子二、結歎

無盡意！觀世音菩薩有如是力！若有眾生，恭敬禮拜觀世音菩薩，福不唐捐。

壬三、結勸持名(分三)

癸一、勸持

是故眾生，皆應受持觀世音菩薩名號。

癸二、格量

無盡意！若有人受持六十二億恆河沙菩薩名字，復盡形供養飲食、衣服、臥具、醫藥。於汝意云何？是善男子、善女人，功德多不？

無盡意言：甚多！世尊！

佛言：若復有人，受持觀世音菩薩名號，乃至一時禮拜供養，是二人福，正等無異，於百千萬億劫不可窮盡。

癸三、結歎

無盡意！受持觀世音菩薩名號，得如是無量無邊福德之利。

庚二、次番問答(分二)

辛一、問

無盡意菩薩白佛言：世尊！觀世音菩薩云何遊此娑婆世界？云何而為眾生說法？方便之力，其事云何？

辛二、答 (分三)

壬一、別答

佛告無盡意菩薩：善男子！若有國土眾生，

應以佛身得度者，觀世音菩薩即現佛身而為說法；

應以辟支佛身得度者，即現辟支佛身而為說法；

應以聲聞身得度者，即現聲聞身而為說法；

應以梵王身得度者，即現梵王身而為說法；

應以帝釋身得度者，即現帝釋身而為說法；

應以自在天身得度者，即現自在天身而為說法；

應以大自在天身得度者，即現大自在天身而為說法；

應以天大將軍身得度者，即現天大將軍身而為說法；

應以毘沙門身得度者，即現毘沙門身而為說法；

應以小王身得度者，即現小王身而為說法；

應以長者身得度者，即現長者身而為說法；
應以居士身得度者，即現居士身而為說法；
應以宰官身得度者，即現宰官身而為說法；
應以婆羅門身得度者，即現婆羅門身而為說法；
應以比丘、比丘尼、優婆塞、優婆夷身得度者，即現比丘、比丘尼、優婆塞、優婆夷身而為說法；
應以長者、居士、宰官、婆羅門婦女身得度者，即現婦女身而為說；
應以童男、童女身得度者，即現童男、童女身而為說法；
應以天龍、夜叉、乾闥婆、阿修羅、迦樓羅、緊那羅、摩睺羅伽、人非人等身得度者，即皆現之而為說法；
應以執金剛神得度者，即現執金剛神而為說法。

壬二、總答

無盡意！是觀世音菩薩成就如是功德，以種種形，遊諸國土，度脫眾生。

壬三、結勸供養（分二）

癸一、正式勸供

是故汝等應當一心供養觀世音菩薩，是觀世音菩薩摩訶薩，於怖畏急難之中，能施無畏，是故此娑婆世界皆號之為施無畏者。

癸二、受旨奉行（分六）

子一、奉命

無盡意菩薩白佛言：

世尊！我今當供養觀世音菩薩。即解頸眾寶珠瓔珞，價值百千兩金，而以與之，作是言：仁者！受此法施珍寶瓔珞。

子二、不受

時觀世音菩薩不肯受之。

子三、重奉

無盡意復白觀世音菩薩言：

仁者！愍我等故，受此瓔珞。

子四、佛勸

爾時，佛告觀世音菩薩：當愍此無盡意菩薩及四眾，天龍、夜叉、乾闥婆、阿修羅、迦樓羅、緊那羅、摩睺羅伽、人非人等故，受是瓔珞。

子五、轉供

即時觀世音菩薩愍諸四眾，及於天龍人非人等，受其瓔珞，分作二分，一分奉釋迦牟尼佛，一分奉多寶佛塔。

子六、結歎

無盡意，觀世音菩薩有如是自在神力，遊於娑婆世界。

己二、重頌_(分三)

庚一、雙頌兩問

爾時，無盡意菩薩以偈問曰：

世尊妙相具 我今重問彼 佛子何因緣 名為觀世音

庚二、雙頌二答(分二)

辛一、總歎行願

具足妙相尊 偈答無盡意 汝聽觀音行 善應諸方所
弘誓深如海 歷劫不思議 侍多千億佛 發大清淨願

辛二、別頌二答(分二)

壬一、頌前答(分二)

癸一、頌總答

我為汝略說 聞名及見身 心念不空過 能滅諸有苦

癸二、頌別答(分二)

子一、頌免除七難(分十二)

丑一、頌火難

假使興害意 推落大火坑 念彼觀音力 火坑變成池

丑二、頌水難

或漂流巨海 龍魚諸鬼難 念彼觀音力 波浪不能沒

丑三、頌墮須彌難

或在須彌峰 為人所推墮
念彼觀音力 如日虛空住

丑四、頌墮金剛山難

或被惡人逐 墮落金剛山
念彼觀音力 不能損一毛

丑五、頌怨賊難

或值怨賊繞 各執刀加害
念彼觀音力 咸即起慈心

丑六、頌刀杖難

或遭王難苦 臨刑欲壽終
念彼觀音力 刀尋段段壞

丑七、頌枷鎖難

或囚禁枷鎖 手足被杻械
念彼觀音力 釋然得解脫

丑八、頌咒詛毒藥難

咒詛諸毒藥 所欲害身者
念彼觀音力 還著於本人

丑九、頌惡鬼難

或遇惡羅刹 毒龍諸鬼等
念彼觀音力 時悉不敢害

丑十、頌惡獸難

若惡獸圍繞 利牙爪可怖
念彼觀音力 疾走無邊方

丑十一、頌蛇蠍難

虺蛇及蝮蠍 氣毒煙火燃
念彼觀音力 尋聲自迴去

丑十二、頌雷雨難

雲雷鼓掣電 降雹澍大雨
念彼觀音力 應時得消散

子二、頌三毒二求

眾生被困厄 無量苦逼身
觀音妙智力 能救世間苦

壬二、頌後答 (分二)

癸一、頌普門示現 (分三)

子一、身業普應

具足神通力 廣修智方便 十方諸國土 無刹不現身
種種諸惡趣 地獄鬼畜生 生老病死苦 以漸悉令滅

子二、意業普觀

真觀清淨觀 廣大智慧觀 悲觀及慈觀 常願常瞻仰
無垢清淨光 慧日破諸闇 能伏災風火 普明照世間

子三、口業普說

悲體戒雷震 慈意妙大雲 澍甘露法雨 滅除煩惱焰

癸二、頌顯機顯應

諍訟經官處 怖畏軍陣中 念彼觀音力 眾怨悉退散

庚三、雙頌二勸(分二)

辛一、頌勸持名

妙音觀世音 梵音海潮音 勝彼世間音 是故須常念
念念勿生疑 觀世音淨聖 於苦惱死厄 能為作依怙

辛二、頌勸供養

具一切功德 慈眼視眾生 福聚海無量 是故應頂禮

戊二、聞品獲益(分二)

己一、持地歎德

爾時，持地菩薩即從座起，前白佛言：

世尊！若有眾生聞是觀世音菩薩品自在之業，普門示現神通力者，當知是人功德不少。

己二、經家述益

佛說是普門品時，眾中八萬四千眾生，皆發無等等阿耨多羅三藐三菩提心。

妙法蓮華經 卷七

陀羅尼品第二十六



丙三、明咒護(分三)

丁一、問答持經功德

爾時，藥王菩薩即從座起，偏袒右肩，合掌向佛，而白佛言：

世尊！若善男子、善女人，有能受持法華經者，若讀誦通利，若書寫經卷，得幾所福？

佛告藥王：若有善男子、善女人，供養八百萬億那由他恆河沙等諸佛。於汝意云何，其所得福，寧為多不？

甚多！世尊！

佛言：若善男子、善女人，能於是經，乃至受持一四句偈，讀誦、解義，如說修行，功德甚多。

丁二、請以神咒護持(分五)

戊一、藥王咒護(分三)

己一、請護

爾時，藥王菩薩白佛言：

世尊！我今當與說法者陀羅尼咒，以守護之。即說咒曰：

安爾。曼爾。摩禰。摩摩禰。旨隸。遮梨第。賒咩。賒履多瑋。羶帝。目帝。目多履。娑履。阿瑋娑履。桑履。娑履。又裔。阿又裔。阿耆膩。羶帝。賒履。陀羅尼。阿盧伽娑娑簸蔗毘又膩。禰毘剃。阿便哆邏禰履。剃。阿亶哆波隸輸地。漚究隸。牟究隸。阿羅隸。波羅隸。首迦差。阿三磨三履。佛陀毘吉利表帝。達摩波利差帝。僧伽涅瞿沙禰。婆舍婆舍輸地。曼哆邏。曼哆邏又夜多。郵樓哆。郵樓哆憍舍略。惡又邏。惡又冶多冶。阿婆盧。阿摩若那多夜。

己二、稱歎

世尊！是陀羅尼神咒，六十二億恆河沙等諸佛所說，若有侵毀此法師者，則為侵毀是諸佛已。

己三、印可

時釋迦牟尼佛讚藥王菩薩言：

善哉！善哉！藥王！汝愍念擁護此法師故，說是陀羅尼，於諸眾生，多所饒益。

戊二、勇施咒護(分二)

己一、請護

爾時，勇施菩薩白佛言：

世尊！我亦為擁護讀誦受持法華經者，說陀羅尼。若此法師得是陀羅尼，若夜叉，若羅刹，若富單那，若吉蔗、若鳩槃荼，若餓鬼等，伺求其短，無能得便。即於佛前而說咒曰：

誑隸。摩訶誑隸。郁枳。目枳。阿隸。阿羅婆第。涅隸第。涅隸多婆第。伊緻柅。韋緻柅。旨緻柅。涅隸墀柅。涅犁墀婆底。

己二、稱歎

世尊！是陀羅尼神咒，恆河沙等諸佛所說，亦皆隨喜，若有侵毀此法師者，則為侵毀是諸佛已。

戊三、毘沙門咒護(分二)

己一、請護

爾時，毘沙門天王護世者白佛言：

世尊！我亦為愍念眾生，擁護此法師故，說是陀羅尼。即說咒曰：

阿梨。那梨。菟那梨。阿那盧。那履。拘那履。

己二、稱歎

世尊！以是神咒擁護法師，我亦自當擁護持是經者，令百由旬內，無諸衰患。

戊四、持國咒護(分二)

己一、請護

爾時，持國天王在此會中，與千萬億那由他乾闥婆眾，恭敬圍繞，前詣佛所，合掌白佛言：

世尊！我亦以陀羅尼神咒，擁護持法華經者。即說咒曰：

阿伽禰。伽禰。瞿利。乾陀利。旃陀利。摩蹉耆。常求利。浮樓莎柅。
。頰底。

己二、稱歎

世尊！是陀羅尼神咒，四十二億諸佛所說，若有侵毀此法師者，則為侵毀是諸佛已。

己一、請護

爾時，有羅刹女等，一名藍婆，二名毘藍婆，三名曲齒，四名華齒，五名黑齒，六名多髮，七名無厭足，八名持瓔珞，九名皋帝，十名奪一切眾生精氣，是十羅刹女，與鬼子母並其子及眷屬，俱詣佛所，同聲白佛

言：

世尊！我等亦欲擁護讀誦受持法華經者，除其衰患，若有伺求法師短者，令不得便。即於佛前而說咒曰：

伊提履。伊提泯。伊提履。阿提履。伊提履。泥履。泥履。泥履。泥履。泥履。樓醯。樓醯。樓醯。樓醯。多醯。多醯。多醯。多醯。兜醯。瓮醯。

己二、稱歎

寧上我頭上，莫惱於法師。若夜叉、若羅刹、若餓鬼、若富單那、若吉蔗、若毘陀羅、若犍馱、若烏摩勒伽、若阿跋摩羅、若夜叉吉蔗、若人吉蔗，若熱病，若一日、若二日、若三日、若四日、若至七日，若常熱病，若男形、若女形、若童男形、若童女形，乃至夢中，亦復莫惱。即於佛

前而說偈言：

若不順我咒 惱亂說法者 頭破作七分 如阿梨樹枝
如殺父母罪 亦如壓油殃 斗秤欺誑人 調達破僧罪
犯此法師者 當獲如是殃

己三、誓願

諸羅刹女說此偈已，白佛言：世尊！我等亦當身自擁護受持讀誦修行是經者，令得安隱，離諸衰患，消眾毒藥。

己四、印可

佛告諸羅刹女：善哉！善哉！汝等但能擁護受持法華名者，福不可量，何況擁護具足受持、供養經卷，華香、瓔珞、末香、塗香、燒香，幡蓋、伎樂，燃種種燈：酥燈、油燈、諸香油燈、蘇摩那華油燈、蒼蔔華油燈、婆師迦華油燈、優鉢羅華油燈，如是等百千種供養者。臯帝！汝等及眷屬，應當擁護如是法師。

丁三、會眾聞品得益

說是陀羅尼品時，六萬八千人得無生法忍。

妙法蓮華經 卷七

妙莊嚴王本事品第二十七



丙四、明人護(分六)

丁一、略明本事

爾時，佛告諸大眾：乃往古世，過無量無邊不可思議阿僧祇劫，有佛名雲雷音宿王華智，多陀阿伽度阿羅訶三藐三佛陀，國名光明莊嚴，劫名喜見。

丁二、標所化能化

彼佛法中，有王名妙莊嚴，其王夫人，名曰淨德，有二子，一名淨藏，二名淨眼。是二子有大神力，福德智慧，久修菩薩所行之道，所謂檀波羅蜜、尸羅波羅蜜、羼提波羅蜜、毘離耶波羅蜜、禪波羅蜜、般若波羅蜜、方便波羅蜜、慈悲喜捨，乃至三十七品助道法，皆悉明了通達；又得菩薩淨三昧、日星宿三昧、淨光三昧、淨色三昧、淨照明三昧、長莊嚴三昧、大威德藏三昧，於此三昧亦悉通達。

丁三、明能化方便(分三)

戊一、時至

爾時，彼佛欲引導妙莊嚴王，及愍念眾生故，說是法華經。

戊二、論議

時淨藏淨眼二子，到其母所，合十指爪掌白言：願母往詣雲雷音宿王華智佛所，我等亦當侍從親近供養禮拜。所以者何？此佛於一切天人眾中說法華經，宜應聽受。

母告子言：汝父信受外道，深著婆羅門法，汝等應往白父，與共俱去。淨藏、淨眼合十指爪掌白母：我等是法王子，而生此邪見家。

母告子言：汝等當憂念汝父，為現神變，若得見者，心必清淨，或聽我等，往至佛所。

戊三、現化

於是二子念其父故，湧在虛空，高七多羅樹，現種種神變。於虛空中，行住坐臥；身上出水，身下出火，身下出水，身上出火；或現大身滿虛空中，而復現小，小復現大；於空中滅，忽然在地；入地如水，履水如地。現如是等種種神變，令其父王心淨信解。

丁四、明所化得益(分十)

戊一、信子伏師

時父見子神力如是，心大歡喜，得未曾有，合掌向子言：汝等師為是誰，誰之弟子？

二子白言：大王！彼雲雷音宿王華智佛，今在七寶菩提樹下，法座上坐，於一切世間天人眾中，廣說法華經，是我等師，我是弟子。

父語子言：我今亦欲見汝等師，可共俱往。

戊二、自求出家

於是二子從空中下，到其母所，合掌白母：父王今已信解，堪任發阿耨多羅三藐三菩提心。我等為父已作佛事，願母見聽，於彼佛所，出家修道。

爾時，二子欲重宣其意，以偈白母：

願母放我等 出家作沙門 諸佛甚難值 我等隨佛學
如優曇鉢羅 值佛復難是 脫諸難亦難 願聽我出家

戊三、勸親覲佛

母即告言：聽汝出家。所以者何？佛難值故。

於是二子白父母言：善哉父母！願時往詣雲雷音宿王華智佛所，親近供養，所以者何？佛難得值，如優曇鉢羅華，又如一眼之龜值浮木孔，而我等宿福深厚，生值佛法，是故父母當聽我等，令得出家。所以者何？諸佛難值，時亦難遇。

戊四、敘歎功德

彼時妙莊嚴王後宮八萬四千人，皆悉堪任受持是法華經。

淨眼菩薩於法華三昧久已通達；淨藏菩薩已於無量百千萬億劫，通達離諸惡趣三昧，欲令一切眾生離諸惡趣故；其王夫人得諸佛集三昧，能知諸佛秘密之藏。二子如是以方便力，善化其父，令心信解，好樂佛法。

戊五、聞法供養

於是妙莊嚴王與群臣眷屬俱，淨德夫人與後宮嫔女眷屬俱，其王二子與四萬二千人俱，一時共詣佛所。到已，頭面禮足，繞佛三匝，卻住一面

爾時，彼佛為王說法，示教利喜，王大歡悅。

爾時，妙莊嚴王及其夫人，解頸真珠瓔珞，價值百千，以散佛上，於虛空中，化成四柱寶臺，臺中有大寶床，數百千萬天衣，其上有佛，結跏趺坐，放大光明。爾時，妙莊嚴王作是念：佛身希有，端嚴殊特，成就第一微妙之色。

戊六、佛授王記

時雲雷音宿王華智佛，告四眾言：

汝等見是妙莊嚴王，於我前合掌立不？此王於我法中作比丘，精勤修習助佛道法，當得作佛，號娑羅樹王，國名大光，劫名大高王；其娑羅樹王佛，有無量菩薩眾及無量聲聞，其國平正，功德如是。

戊七、出家修行

其王即時以國付弟，與夫人二子，並諸眷屬，於佛法中，出家修道。王出家已，於八萬四千歲，常勤精進，修行妙法華經。過是已後，得一切

淨功德莊嚴三昧。

戊八、稱歎二子

即升虛空，高七多羅樹，而白佛言：

世尊！此我二子，已作佛事，以神通變化，轉我邪心，令得安住於佛法中，得見世尊。此二子者，是我善知識，為欲發起宿世善根，饒益我故，來生我家。

戊九、佛述行高

爾時，雲雷音宿王華智佛，告妙莊嚴王言：

如是！如是！如汝所言！若善男子、善女人，種善根故，世世得善知識，其善知識能作佛事，示教利喜，令入阿耨多羅三藐三菩提。

大王當知！善知識者，是大因緣，所謂化導，令得見佛，發阿耨多羅三藐三菩提心。

大王！汝見此二子不？此二子已曾供養六十五百千萬億那由他恆河沙諸佛，親近恭敬，於諸佛所，受持法華經，愍念邪見眾生，令住正見。

妙莊嚴王即從虛空中下，而白佛言：

世尊！如來甚希有，以功德智慧故，頂上肉髻光明顯照，其眼長廣而紺青色，眉間毫相，白如珂月，齒白齊密，常有光明，脣色赤好，如頻婆果。

爾時，妙莊嚴王讚歎佛如是等無量百千萬億功德已，於如來前，一心合掌，復白佛言：世尊！未曾有也！如來之法，具足成就不可思議微妙功德，教戒所行，安隱快善；我從今日，不復自隨心行，不生邪見、憍慢、瞋恚、諸惡之心。說是語已，禮佛而出。

丁五、結會古今

佛告大眾：於意云何？妙莊嚴王豈異人乎？今華德菩薩是。其淨德夫人，今佛前光照莊嚴相菩薩是，哀愍妙莊嚴王，及諸眷屬故，於彼中生。其二子者，今藥王菩薩、藥上菩薩是。是藥王、藥上菩薩，成就如此諸大功德，已於無量百千萬億諸佛所，植眾德本，成就不可思議諸善功德。若有人識是二菩薩名字者，一切世間諸天人民，亦應禮拜。

丁六、聞品進道

佛說是妙莊嚴王本事品時，八萬四千人遠塵離垢，於諸法中，得法眼淨。

妙法蓮華經 卷七

普賢菩薩勸發品第二十八



乙三、約自行勸流通 (分四)

丙一、經家敘儀

爾時，普賢菩薩以自在神通力，威德名聞，與大菩薩無量無邊不可稱數，從東方來。所經諸國，普皆震動，雨寶蓮華，作無量百千萬億種種伎樂。又與無數諸天龍、夜叉、乾闥婆、阿修羅、迦樓羅、緊那羅、摩睺羅伽、人非人等，大眾圍繞，各現威德神通之力。到娑婆世界，耆闍崛山中，頭面禮釋迦牟尼佛，右繞七匝。

丙二、普賢勸發 (分二)

丁一、請問勸發 (分二)

戊一、問

白佛言：世尊！我於寶威德上王佛國，遙聞此娑婆世界說法華經，與無量無邊百千萬億諸菩薩眾，共來聽受，惟願世尊當為說之。

若善男子、善女人，於如來滅後，云何能得是法華經？

戊二、答

佛告普賢菩薩：若善男子、善女人，成就四法，於如來滅後，當得是

法華經：一者，為諸佛護念；二者，植眾德本；三者，入正定聚；四者，發救一切眾生之心。

善男子、善女人，如是成就四法，於如來滅後，必得是經。

丁二、誓願勸發 (分二)

戊一、誓願護人 (分六)

己一、攘其外難

爾時，普賢菩薩白佛言：世尊！於後五百歲濁惡世中，其有受持是經典者，我當守護，除其衰患，令得安隱，使無伺求得其便者，若魔、若魔子、若魔女、若魔民、若為魔所著者，若夜叉、若羅刹、若鳩槃荼、若毘舍闍、若吉蔗、若富單那、若韋陀羅等，諸惱人者，皆不得便。

己二、教以內法 (分三)

庚一、行立讀誦

是人若行若立，讀誦此經，我爾時乘六牙白象王，與大菩薩眾，俱詣其所，而自現身，供養守護，安慰其心，亦為供養法華經故。

庚二、常坐思惟

是人若坐，思惟此經，爾時我復乘白象王現其人前，其人若於法華經有所忘失一句一偈，我當教之，與共讀誦，還令通利。

爾時，受持讀誦法華經者，得見我身，甚大歡喜，轉復精進，以見我故，即得三昧及陀羅尼，名為旋陀羅尼、百千萬億旋陀羅尼、法音方便陀羅尼，得如是等陀羅尼。

庚三、三七精進

世尊！若後世後五百歲濁惡世中，比丘、比丘尼、優婆塞、優婆夷，求索者，受持者，讀誦者，書寫者，欲修習是法華經，於三七日中，應一心精進。滿三七日已，我當乘六牙白象，與無量菩薩而自圍繞，以一切眾生所喜見身，現其人前，而為說法，示教利喜。

亦復與其陀羅尼咒，得是陀羅尼故，無有非人能破壞者，亦不為女人之所惑亂，我身亦自常護是人，惟願世尊！聽我說此陀羅尼咒。即於佛前而說咒曰：

阿檀地。檀陀婆地。檀陀婆帝。檀陀鳩舍隸。檀陀修陀隸。修陀隸。修陀

羅婆底。佛陀波羶禰。薩婆陀羅尼阿婆多尼。薩婆婆沙阿婆多尼。修阿婆多尼。僧伽婆履叉尼。僧伽涅伽陀尼。阿僧祇。僧伽婆伽地。帝隸阿情僧伽兜略阿羅帝婆羅帝。薩婆僧伽地三摩地伽蘭地。薩婆達磨修波利剎帝。薩婆薩埵樓駄憍舍略阿菟伽地。辛阿毘吉利地帝。

己三、覆以神力

世尊！若有菩薩得聞是陀羅尼者，當知普賢神通之力。若法華經行闍浮提，有受持者，應作此念，皆是普賢威神之力。

己四、顯現勝因

若有受持讀誦，正憶念，解其義趣，如說修行，當知是人行普賢行，於無量無邊諸佛所，深種善根，為諸如來手摩其頭。

己五、示以近果

若但書寫，是人命終當生忉利天上，是時八萬四千天女，作眾伎樂而來迎之，其人即著七寶冠，於姝女中，娛樂快樂；何況受持讀誦，正憶念

，解其義趣，如說修行。若有人受持讀誦，解其義趣，是人命終，為千佛授手，令不恐怖，不墮惡趣，即往兜率天上彌勒菩薩所。

彌勒菩薩有三十二相，大菩薩眾所共圍繞，有百千萬億天女眷屬而於中生，有如是等功德利益。

己六、總結勸修

是故智者應當一心自書，若使人書，受持讀誦，正憶念，如說修行。

戊二、誓願護法

世尊！我今以神通力故，守護是經，於如來滅後，閻浮提內，廣令流布，使不斷絕。

丙三、如來述發(分二)

丁一、先述護法

爾時，釋迦牟尼佛讚言：

善哉！善哉！普賢！汝能護助是經，令多所眾生安樂利益，汝已成就不可思議功德，深大慈悲，從久遠來，發阿耨多羅三藐三菩提意，而能作

是神通之願，守護是經。我當以神通力，守護能受持普賢菩薩名者。

丁二、正述護人（分五）

戊一、示其身教

普賢！若有受持讀誦，正憶念，修習書寫是法華經者，

當知是人，則見釋迦牟尼佛，如從佛口，聞此經典；

當知是人，供養釋迦牟尼佛；

當知是人，佛讚善哉；

當知是人，為釋迦牟尼佛手摩其頭；

當知是人，為釋迦牟尼佛衣之所覆。

戊二、顯示勝因

如是之人，不復貪著世樂，不好外道經書手筆，亦復不喜親近其人及諸惡者，若屠兒，若畜豬羊雞狗，若獵師，若街賣女色。是人心意質直，有正憶念，有福德力，是人為三毒所惱，亦復不為嫉妬、我慢、邪慢、增上慢所惱，是人少欲知足，能修普賢之行。

戊三、述以近果

普賢！若如來滅後，後五百歲，若有人見受持讀誦法華經者，應作是念：此人不久當詣道場，破諸魔眾，得阿耨多羅三藐三菩提，轉法輪，擊法鼓，吹法螺，雨法雨，當坐天人大眾中師子法座上。普賢！若於後世，受持讀誦是經典者，是人不再貪著衣服、臥具、飲食資生之物，所願不虛，亦於現世得其福報。

戊四、攘其外難

若有人輕毀之言：汝狂人耳，空作是行，終無所獲。如是罪報，當世世無眼。若有供養讚歎之者，當於今世得現果報。若復見受持是經者，出其過惡，若實、若不實，此人現世得白癩病；若有輕笑之者，當世世牙齒疏缺，醜唇、平鼻、手腳繚戾、眼目角眦、身體臭穢、惡瘡膿血、水腹短氣、諸惡重病。

戊五、信受功德

是故普賢！若見受持是經典者，當起遠迎，當如敬佛。

丙四、聞品受益(分二)

丁一、聞品利益

說是普賢勸發品時，恆河沙等無量無邊菩薩得百千萬億旋陀羅尼，三千大千世界微塵等諸菩薩具普賢道。

丁二、聞經利益

佛說是經時，普賢等諸菩薩，舍利弗等諸聲聞，及諸天龍人非人等，一切大會，皆大歡喜，受持佛語，作禮而去。

——《妙法蓮華經》竟——

願以此功德
莊嚴佛淨土
上報四重恩
下濟三塗苦
若有見聞者
悉發菩提心
盡此一報身
同生極樂國

《妙法蓮華經》

敬輯者：淨土教觀學苑
導師 釋淨界

倡 印：淨土教觀學苑 電話：0983-993033

護持學苑弘法帳號

國內郵局劃撥 郵局代碼：700 帳號：22767067

戶名：社團法人台灣淨土教觀學苑學會

海外國際電匯

台灣銀行 南投分行 戶名：淨土教觀學苑 帳號：032-007-156495

Bank Name: Nantou Branch, Bank of Taiwan

Swift Code : BKTWTWTP032

Account Name : Pureland Teaching Buddhist Foundation

Account No. : 032-007-156495

供養^上淨^下界法師帳號

台灣本地匯款

安泰銀行 中和分行戶名：丘崇禧 帳號：016-22-028333000

國際匯款帳戶 The International Account

安泰銀行 中和分行 Chung He Branch, Entie Commercial Bank

Swift Code : Entitwtp

Account Name : Chiu, Chung-Hsi

Account No. : 016-50-028333100